

適園叢書

張宗祥







吹景集卷之八

烏程

董斯張遐周著

韓昌箕仲弓訂

史記殷本紀逸書

焦澹園曰趙子昂歸太僕梅學正俱辨尙書古文爲僞書則今所傳湯誥亦非伏生口授矣按史記中載湯誥與古文絕不同其文較四十二篇似相類當取史記參之錄殷本紀并徐廣索隱注閒有一得亦附之如左

序曰旣紂夏命還亳作湯誥

維三月王自至於東郊告諸侯羣后毋不有功於民勤力迺事予乃大罰殛女母子怨

張按記曰殷人先罰而後賞信然哉乃司馬法曰夏后氏賞而不罰殷人罰而不賞誣矣

曰古禹皋陶久勞于外其有功乎民民乃有安

張按八年於外惟神禹獨也久擬之周官禹冬而皋陶秋也其竝舉治水之績云何疑有錯簡當曰禹皋陶有功乎民民乃有安禹久勞于外云云

東爲江北爲濟西爲河南爲淮四瀆已修萬民乃有居后稷降播農殖百穀三公咸有功于民故后有立

徐廣曰立一作土索隱曰謂禹皋陶有功於人建立其後故云有立

昔蚩尤與其大夫作亂百姓帝乃弗予

音與有狀

索隱曰帝天也謂蚩尤作亂上天乃不佑之是爲弗與有  
狀言其罪大而有形狀故黃帝滅之

張按呂刑云蚩尤惟始作亂延及于平民罔不寇賊鴟義  
奸宄奪攘矯虔鄭玄注云蚩尤霸天下黃帝所伐者夫夏  
命始紂率土更新當急繕寬大之政而乃援蚩尤以厲侯  
服何哉蓋禹之明德遠矣昆吾韋顧雖已就僂而餘孽且  
繁或有借斟尋之說以倡亂于天下湯故援此以戒之言  
力如蚩尤可以霸矣而卒有涿鹿之敗不言昆吾而言蚩  
尤蚩尤神農氏之霸昆吾夏后氏之霸也曰禹曰皋陶曰  
后稷皆先臣堯而後臣舜者也噫其詞微矣竹書曰桀卒  
于亭山禁弦歌舞只此一端湯心與虞夏何異孟子曰若

湯則聞而知之季札曰聖人之弘也而猶有慙德真知言  
哉若汲冢書殷祝解曰湯放桀再拜從諸侯之位讓三千  
諸侯莫敢卽位然後湯卽天子之位與諸侯誓曰陰勝陽  
卽謂之變而天弗施雌勝雄卽謂之亂而人弗行此則太  
似不情其詞亦與周書不類定爲後人羸入且繫書于周  
何得專紀殷事可刪也

先王言不可不勉曰不道毋之在國

徐廣曰之一作政索隱曰不道猶無道也又誠諸侯云汝  
爲不道我則無令汝之在國

女毋我怨以命諸侯

張按國語內史過引湯誓曰余一人有辜無以萬夫萬夫

有鼻在余一人今載之湯誥以方字易夫字湯誥中此語  
似亦後人所竄者左正明當不妄取湯誥爲湯誓今湯誓  
亦非全文哉

泰誓今文 湯武逸書

河內女子所獻泰誓一篇亦與古文不同按史記武王渡河  
中流白魚躍入王舟中武王俯取以祭既渡有來自上復于  
下至于王屋流爲鳥其色赤其聲魄云索隱曰此已下至流  
爲鳥見今文泰誓馬融曰王屋王所居屋流行也魄然安定  
意也鄭主曰書說云烏有孝名武卒父大業故烏瑞臻赤者  
周之正色也索隱曰按今文泰誓流爲鵬鵬鷲鳥也然則今  
文泰誓唐初猶有存者卽河內女子本也惜無從見之又詩

疏引泰誓曰師乃餘譟前歌後舞格于上天下地咸曰孜孜

無怠又引泰誓曰司馬在前漢書引泰誓云立功立事劉歆

三統歷論引今文泰誓云丙午還師以上四則見玉海說苑引泰誓

曰附下而剛上者死附上而剛下者刑與聞國政而無益於

民者退在上位而不能進賢者逐墨子引泰誓曰小人見姦

巧乃聞不言也發罪鈞又引泰誓夫發篇曰惡乎君子天有

顯德其行甚章惟我有周受之上帝毛詩註疏鴻雁小序注

引書曰天將自立父母民之有政有居疏云今泰誓文言天

將有立聖德者爲天下父母民之得有善政有安居爲重也

漢郊祀志引泰誓曰稽古立功立事可以永年丕天之大理

注今文泰誓也以上二則見學齋佔畢此皆古文不載者史記載湯征



亦逸書其詞云湯征諸侯葛伯不祀湯始伐之湯曰予有言  
人視水見形視民知治不伊尹曰明哉言能聽道乃進君國  
子民爲善者皆在王官勉哉湯曰汝不能敬命予大罰殛之  
無有攸赦作湯征又周本紀云九年武王上祭于畢東觀兵  
至于盟津爲文王木主載中軍武王自稱太子發言奉文王  
以伐不敢自專乃告司馬司徒司空諸節齊栗信哉予無知  
以先祖有德臣小子受先功畢立賞罰以定其功遂興師師  
尙父號曰總爾眾庶與爾舟楫後至者斬按此文語極爾雅  
今書不載豈亦書之逸耶篇并錄於此

史漢引詩書異同略

漢書中多與今詩文字異同古今人表南仲作南中仲山甫

作中山甫張仲作張中蕃維司徒蕃作皮中允膳夫允作術  
聚子內史聚作擷馮維師氏耦作萬功臣表徐方既來之來  
作徠匡衡甥嬖嬖在疾之嬖作癘劉向傳滄滄訛訛之滄作  
歛黽勉從事作密勿從事讒口囂囂之囂作噉日有食之之  
食作蝕山豕萃崩之萃作卒王莽傳不畏強禦之禦作圉邦  
國殄悴之悴作頽地理志駟鐵作駟載淇澳作淇奧敘傳或  
哲或謀之哲作哲又史漢引書與今文字異者堯典俊德之  
俊史記作馴宅嵎夷史作郁夷平秩東作平秩史作便程鳥  
獸孳尾孳尾史作字微平在朔易史作便在伏物厥民隩隩  
史作與有鰥史作有矜釐降史作飭下舜典惟刑之恤哉恤  
曳作靜今文幽州史作幽陵阻饑史作始饑今文祖五品不遜



史作不馴五流有宅史作有度胄子史作穉子契漢百官表

作高皋陶百官表作咎繇益百官表作恭古今表作栢益皋

陶謨皋陶曰都史作於勵翼史作高翼夙夜浚明史作蚤夜

翊明祇敬史作振敬益稷五聲八音在治忽史作來始滑索隱

曰古今尚書作在治忽今文作采政忽先儒各隨字解之今此云來始滑於義無所通蓋來采字相近滑忽聲相亂始又

與治相似因誤為來始滑今依今文音采政忽三字劉伯莊云聽諸侯能為政忽怠者是也罔水行舟罔

史作毋敕天之命敕史作陟颺言史作揚言禹貢刊木刊漢

書地理志作棐衡漳之漳漢作章島夷之島史漢俱作鳥濟

河之濟漢作沛兗州之兗史作沈灘沮之灘史漢俱作雍厥

筐之筐漢作棐維淄漢作惟幽廣斥史漢俱作廣瀉槩絲史

作會絲夏翟之翟漢作狄泗濱漢作泗瀕暨魚暨史漢俱作

泉彭蠡既瀦瀦史作都陽鳥攸居攸漢作道瑤琨漢作瑤瓊

沿于江海沿史作均達于淮泗達漢作通孔殷史作甚中沈

潛之潛史作涿漢作灑羽毛史作羽旄逾于洛史漢俱作維

滎波史作滎播孟豬史作明都漢作盟豬岷嶓史作汶嶓青

黎史作青驪西傾漢作西頃是來漢作是徠崑崙史作昆侖

陪尾史作負尾孟津史作盟津大伾史作大邳洛水史作降

水導漾史作導漾滄浪史作蒼浪至于澧史作至于禮東迤

史作東池四隩史作四奧刊旅史作栞旅男邦史作任國西

戎卽敘之敘漢西域傳作序甘誓孛戮孛史作帑湯誓稽事

史作嗇事正夏史作政夏大賚史作大理仲虺之誥虺史作

鬻荀子作說命傅巖史作傅險高宗彤日雝雝史作响雝維

先格王漢孔光傳作假王天既乎命孔光傳作天既付命王  
司敬民司史作嗣戡黎之黎史作饑一作者格人史作假人  
微子父師史作太師淪喪史作典喪出狂史作出往家耄遜  
于荒史作家保于喪指告之指史作故牧誓微盧之盧史作  
纒如熊如熊史作如豺如離洪範緜陘洪水之洪史作鴻敬  
用五事之敬漢五行志作羞思曰睿之睿漢作容從作又之  
又漢作艾虐弑獨史作侮鰥寡無黨無偏之無史作毋敷言  
之敷史作傅沈潛之潛史作漸曰霽之霽史作濟曰蒙之蒙  
史作沛漢作霽音邁衍忒之忒史作貢蕃廡史作繁庶恒賜  
史漢俱作恒賜豫恒煥史漢俱作舒恆與王省史作王省俊  
民史作峻民金滕邁厲虐疾史作勤勞淹疾丕子史作負子

寶命史作葆命大誥天棐忱辭之忱漢孔光傳作諶召誥無  
遺壽耆作無遺耆老無逸史作毋逸亮陰史作亮闇嘉靖史  
作密靖君頤甘盤史作甘般又王莽傳云我嗣事子孫大不  
克其上下邇失前人光在家不知命不易天應棐諶乃亡隊  
命亦與今書少異洛誥無若火始燄燄漢書作毋若火始庸  
庸公無困哉漢作公無困我肅慎之命史作息慎顧命彤伯  
漢古今表作師伯虎臣漢作龍臣仲桓漢作中桓南宮毛漢  
作南宮髦罔命之罔史作禦漢作嬰呂刑史作甫刑墨辟之  
墨史作黥百鍰之鍰史作率音刷一作選惟倍史作倍灑一  
作倍蓰荆辟之荆史作臚費誓之費史作勝一作鮮一作獮  
按王伯厚云尙書文字異同者七百餘茲略舉史漢如右若

漢儒引書異字異義備載玉海及困學紀聞餘冬序錄亦不

具錄

漢隸孔彪碑無偏無黨遵王之素王君廟碑曰庶績夙熙諸書亦不載

### 補王伯厚詩攷

伯厚詩攷引諸書中字義異同及辭君韓詩章句極詳覈茲

更得十餘則補之 荀子引節南山云維天子是庫卑民不

迷庫今作毘卑今作俾 子華子引野有蔓草云有美一人

清風婉兮風今作揚 說苑引黍苗原隰既平泉流既清本

立而道生 漢隸辭君碑引詩永矢不愆考樂今作弗緩 水經注

引魯頌保其鳧嶧 韓詩于嗟歎辭辭君章句騶虞文選注 使我心

疇伯兮文選注 彼已之子碩大且篤非良篤脩身行之君子其

孰能與之哉椒聊韓詩外傳 和樂且湛辭君曰樂之甚也常棣文選注



檀車縷縷林杜伯厚引作張張誤釋文

彼交庶紓天子所予言必交

吾志然後予

采菽外傳

刑于寡妻刑正也

思齊釋文

烝美也濯美

也

文王有聲釋文

辭君曰壘水流貌

鳧鷖文選注

對彼雲漢辭君曰

宣王遭亂仰天也

雲漢文選注

辭君曰幹正也謂以其義非而

正之

韓奕文選注伯厚引此闕下句

辭君曰宋襄公去奢節儉

商頌文選注

師臣者帝交愛臣者王臣臣者霸臣不行者亡

韓詩內傳伯厚引此亦闕

下二句

又姜后曰睢鳩之鳥猶未常見其乘居而匹遊

文選注按

此當本三家詩說此皆困學翁之所逸也

### 逸孟子

王伯厚玉海云孟子有外書四篇性善辨文說孝經為正其

文不能弘深不與內篇相似又錄論衡法言諸書引逸孟子

十則困學紀聞補入鹽鐵論三則何燕泉引鮑昭河清頌梁  
處士傳序二則史慶長學齋佔畢引鹽鐵論堯舜之道非遠  
人也數語茲更得八則附伯厚慶長燕泉後高子問於孟子  
曰夫嫁娶者非己所自親也衛女何以得編於詩也孟子曰  
有衛女之志則可無衛女之志則怠又吞舟之魚不居潛澤  
度量之士不居汙世夫藝冬至必彫吾亦時矣前見韓詩外  
傳今人之性善將皆失喪其性故也又人之學者其性善見  
荀子性惡篇人知以食愈飢莫知以學愈愚見劉向說苑阿  
諛事貴脅所尊俗之情也見後漢張衡傳注千年一聖謂  
之連步見梁蕭綺拾遺錄戰者危事也見北堂書鈔世閒方  
冊何限子輿逸語要自不乏恨僕家藏書都散世不乏嗜古

者博搜之或得片語殊勝眞珠船也

學齋古語又引孟子曰吾於河廣知德之至也

張按今本鹽鐵論及王逸楚辭章句所引並作孔子曰繩祖所據殊誤

### 論語孟子文字異同

伯厚載逸論語二則齊論有問王知道二篇又釋文中魯讀十九事瓜祭之讀爲必祭晦庵亦從魯讀矣今證之說文史漢與語孟文字頗有同異論語說文以杖荷篠篠作莜色勃如也勃作孛不使勝食氣氣作旣啟予足作路予之足羿善射羿作彗文質彬彬作份份瑚璉之璉作璉仍舊貫之仍作扔硜硜之硜作磬褻裘長作結衣長友便佞之便作編誅曰作讎曰翼如也作選如小人窮斯濫矣濫作媼愬子路於季孫愬作訴狐貉作狐貍荷簣而過孔氏之門作荷與耨而不



輟糧作擾史記師也辟之辟作僻由也諺之諺作嘑縲縲作  
累繼尙德哉作上德哉吾與點也作歲也巫馬期之期作旗  
申棖作申黨歸與歸與作歸乎歸乎便便言作辯辯言君召  
使擯之擯作儻末由也已之末作篋鳳鳥不至作維不出書  
漢古今表播鼗武之鼗作鞞仲突仲忽作中突中召虞仲作  
虞中漆雕開作漆雕啟仲叔圉作中叔圉闕黨童子之闕作  
厥棘子成之棘作革荷蕢之荷作何微生畝作尾生晦佛臍  
作莠臍宣元六王傳無求備於一人之無作毋辟宣傳焉可  
誣也之誣作憮朱雲傳攝齊升堂之齊作齋元后傳無所措  
手足之措作錯東方朔傳卜莊子作弁嚴子無爲而治漢隸  
孟郁碑作無爲如治辭君碑鑽之彌堅之鑽作鑄劉修碑鄉

黨恂恂作遜遜祝睦碑又作逡逡蔣君碑遵五屏四費鳳碑  
泥而不滓洪氏以爲涅而不緇又初學記引逸論語云玉十  
謂之區注雙玉曰穀五玉曰區北堂鈔引逸論語云璠三采  
玉也升庵引逸論語云如玉如瑩爰變丹青此亦伯厚所未  
載孟子白鳥鶴鶴說文作翯翯成颯作成颯源源而來之源  
作諫孝子之心爲不若是愬作忝接浙而行作澆浙二女果  
作媠迨天之未陰雨迨作隸曾西艷然作愨然史記梁惠王  
謀欲攻趙孟子稱太王去邠又顏讐由作顏囁鄒漢古今表  
樂正裘牧仲作樂正求牧中華周作華州食貨志抱關擊柝  
之柝作柝漢隸議郎元賓碑枉尺直搆齊民要術引雖有鎡  
基作鎡鎡諸家定有師承非臆說也

孔子於衛主癯  
疽說苑作雍雖

吹景集卷之八終



吹景集卷之九

董斯張遐周著

烏程

韓昌箕仲弓訂

竹書紀年不可不讀

十日並出今人但知堯年而不知胤甲八年亦有此孽後元  
年今人但知漢文始而不知魏惠成王三十六年復改元夜  
中星隕如雨但知周莊王時而不知先紀於帝桀之十年玉  
化爲蝶但知開元帝逸事而不知惠王出居于鄭玉化爲蛾  
射人老生以不準所得書如項曼都說天上事詭妄不可信  
亦夏蟲不可語冰者耶

按史記秦惠王十四年復稱後元年則又在惠成改元後二年矣惠成之

三十六年當  
赧王之元年



雨金非休徵

任彥升述異載古詩安得天雨金使金賤如土案雨金亦非  
休徵禹八年六月雨金于夏邑是秋禹陟于會稽成王三十  
四年雨金于咸陽三十七年夏四月遂有馮几之命襄王三  
年雨金于晉七年戰韓原秦繫夷吾以歸蓋金乘兌氣毀折  
之象律中夷則亦著傷形從上而下曰雨其君當之五行所  
稱白祥也

驪戎來賓

宋開寶中女直始入貢乃臣構稱名太師函首已釀于贄琛  
之日成王歸自東都大事于太廟而驪戎已來賓矣王會圖  
便是黍離譜倚伏不容髮可畏易戒履霜詩勤桑土春秋書

會戎于潛皆所謂謹之幾先也 祖宗禁日本通貢真識馭  
夷大體忽必烈不信耶律信角端黷武視和戎臧之與穀耳

五觀 彭祖

左傳夏有觀扈國語楚士亶云啟有五觀韋昭注五觀卽太  
康昆弟也酈元水經注亦因之按書五子歌惓惓先訓此五  
子者啟賢胤也何得以商均管蔡況之王伯厚已有辨攷竹  
書帝啟十一年放王季子武觀沈約注武觀卽五觀也十五  
年武觀復叛彭伯壽征之乃來歸觀誠朱均之亞矣按漢東  
有畔觀縣當据觀之畔而名之耶彭伯卽箋鏗此一則可錄  
彭祖佚事又風俗通云陸終娶鬼方氏孕三年啟其左脅三  
人出焉啟其右脅三人又出焉一曰昆吾二曰參明三曰彭

祖四曰會人五曰曹姓六曰季連彭祖者一產六兄弟且皆從脅而出則所謂修己背垢而生禹篋狄胷剖而生契又不足怪矣昆吾霸于夏彭祖卽大彭也霸于商季連莘姓楚其後也霸于周三兄弟爲三代三霸尤奇之奇者一云彭祖至殷末七百二十年遁入流沙不知所終此與他所傳唾近而杖遠者亦異并著之

宜曰文武成康之罪人

弁彼鷩斯一章嗚咽不能竟讀然宜曰亦僅歌瑣尾未若武丁之殪孝己也借手腥臙遷我鎬鼎熊蹯不熟推刃何殊眞古來亂臣賊子中第一非幽王之罪人實文武成康之罪人也說者率以社稷爲重君爲輕解之攷當時虢公翰立王子



余臣子攜是爲攜王號公疾風勁草哉秦素號虎狼餌邠岐  
田其無足怪使晉鄭明冠履大義奉余臣子宗周梟宜白而  
謝其父周家有祭主天下有人倫百世祀之可矣計不出此  
而覲焉戴殺父之賊以爲君不過以彤弓拒鬯抹殺倫理兩  
字耳噫聖人安得無春秋

胡傳用逸周書語

先儒駁汲冢書爲不經乃康侯傳己卯烝采周月解中語今  
節錄云夏數得天百王所同其在商湯用師于夏除民之災  
順天革命改正朔變服殊號一文一質示不相沿以建丑之  
月爲正易民之視若天時大變亦一代之事亦越我周王致  
伐于商改正異械以垂三統至於敬授民時巡狩祭享猶自

夏焉是謂周月以紀于政又其傳西狩獲麟孔子曰我欲見  
之空言不知行事之深切著明也亦全錄緯文此老說經遠  
勝乃郎致堂史論趙大州先生言物不通方則國窮學不通  
方則見陋不朽語

管城子與孔方兄不兩立

長卿不典鸚鵡裘不能使邦君負弩子雲不卻富人萬錢不  
能捧筆從豹尾後手中多一錢腹中便少一字始皇帝燔書  
爲十二銅人張本耳管城子與孔方兄真不兩立哉

文問南陽以錢

爲神可也謂之兄何居曰只是金戈耳客大笑

奠雁辨

澹園老人辨昏禮奠雁曰古人重冠昏皆以士而用大夫車

服不以爲僭大夫相見執雁見婦翁時不得不用大夫之贄  
禮矣援儀禮爲券殊確適閱後漢昏禮首玄纁羊雁解云羊  
者祥也羣而不黨雁則隨陽漢人語精簡不可及董生曰此  
雝雝鳴雁義疏也漢昏禮見白六帖今范蔚宗書不載者章懷  
注皇后紀亦引此語微有異

### 霍大將軍

霍大將軍元妃東閭氏見前漢書注後妻顯一服淫婢子耳  
至今與孫壽並舉此第一不學無術處然亦其止有以啟之  
當年金屋猶貯阿嬌更衣不進衛子何煩令狐茂壺關一書  
博陸之不懲博望神奪其魄哉霍光妻一產二子見西京雜記光又有典衣奴曰還車見

雲笈  
七籤

舍利受福

漢昏禮中復紀舍利受福二獸解云舍利獸廉而謙受福獸體恭心慈斯大禹山經所未載按蔡質漢儀正月旦天子作九賓樂舍利從西方來戲於庭極隋書音樂志大業中追四方散樂大集東都有舍利先來跳躍激水滿衢此卽漢昏禮中物哉乃小本彌陀云鸚鵡舍利疏稱梵語舍利此云鷲鷲又隋書婆利國有鳥名舍利解人語則舍利復是羽族矣受福不見他書唯南齊志云玉輅漆畫輪受福輶又云金塗受福望龍諸校飾又云檠戟織成衣金塗沓駐及受福晉張敞東宮舊事云皇太子納妃有銀龍頭受福蓮華鉤鑲四副則江左時玉輅銀鉤猶有此製此獸不知作何形模唐後殊不

聞此又蒲葦二種解云蒲眾多性柔葦柔之久按荀子云與時屈伸柔從若蒲葦樂府焦仲卿妻蒲葦紉如絲源此哉

### 舍利非舍利辨

舍利獸博徵羣典無可據鄭康成姻禮謁文贊云舍利爲獸獸而能謙禮義乃食口無譏譽西京賦舍利颯颯記爲仙車注舍利獸名性吐金又曹子建顰舞歌白虎戲西除舍利從辟邪梁元帝纂要秦漢有扛鼎象人怪獸舍利之戲此與漢儀隋書所引正合舍利當爲舍利無疑

### 騶虞

山經林氏國有珍獸大若虎五彩畢具尾長于身名曰騶吾乘之日行千里于嗟乎騶虞意卽此陸璣疏云白文黑章此



云五彩畢具微不同瑞應圖云酋耳如虎絕大不食生物能  
伏虎豹王會云史林以尊耳則騶虞有四名矣而賈生殊以  
爲誕新書曰騶者天子之囿也虞者囿之司獸者也本韓詩  
章句說果爾則王會所紀西申之鳳規矩之麟亦豈野鳥爲  
鸞歟騶詩傳作鄒歐陽公羅長原焦先生同賈說小有異喜  
新太過耳歐公不信河圖洛書何有騶虞哉野客叢書太倉  
稊米二書辨之甚詳茲不復載王伯厚云騶虞騶吾騶牙一  
物也羅願爾雅翼以騶虞爲馬亦有見

用修引蹇叔處干語

用修解出宿于干引韋氏歷紀云蹇叔處干而干亡入秦而  
秦霸蓋虞字訛爲于于又訛爲干字三寫烏焉成馬蹇叔又

百里之誤也飯牛一事猶好事者爲之況漢人說春秋事乎  
卽西晉一命升或云于姓或云于今其裔了不知所從用修  
依此解經真藉直不可耐

肅雝詩

用修又解平王之孫齊侯之子云平王非周平王猶書稱寧  
王格王此解本毛萇傳孔穎達正義義猶未墮至云齊侯非  
姜氏後直竊王安石嚙語齊子由歸亦非文姜耶周公之孫  
莊公之子亦非魯僖耶周頌不顯成康毛鄭俱以爲非成王  
康王言武王成大功而安之也子由詩傳亦祖之儒先好鑿  
乃爾用修未超此論平王之孫子由同楊說且以齊襄公爲  
齊侯呂伋亦不可通

章俊卿山堂考索  
鄭樵通志與僕合

干非邗辨

衛風出宿于干用修云干邗通開封有邗溝此據羅泌而誤者也邗在揚州吳夫差闕溝處杜預左傳注云邗溝廣陵韓江是許太尉云國也从邑干聲今屬臨淮本屬吳按史記紂以鄂侯爲三公徐廣注鄂一作邗漢河內有邗城又文王伐邗括地志云邗城在懷川河內縣西北二十七里水涇注沁水南流逕邗城西故邗關也城南有邗臺朱鬱儀箋云左傳邗晉應韓武之穆也邗音于邗水邗關並當作邗然則邗非邗也邗豈得爲干乎易漸之初六鴻漸于干注水湄也小雅秩秩斯干注澗也郡國志東郡衛國有干城水經注泝水又東南經干言山用修不引二書豈未之覩耶



舟人之子解

小東舟人之子熊羆是裘傳以爲舟楫之人如漢帝嬖黃頭  
郎錫之銅山恐未爾當讀爲何以舟之之舟子由公劉章解  
舟奉也樂毅書奉命可幸無罪卽便辟趨承意晦庵解云舟  
帶也字書帶字詁云繫佩也亦小人繫結于其君之意周禮  
云司裘季秋獻功裘以待頒賜則熊羆之裘是華臚服私人  
猶諧臣弄臣百僚是試居然清瑣點朝班矣言箕斂東人匪  
殞無節侯服不堪命也古有舟姜敦博古圖讀爲周鄭康成  
詩箋云舟作周裘作求謂周世臣子孫退在賤官使博熊羆  
在冥氏宄氏之職殊傳會不經一云舟恐州字之誤春秋州  
公如曹傳曰天子三公稱公州是當時三公未可知一云國

語曰禿姓舟人周滅之韋昭曰舟國名夫舟旣爲周所滅則舟已屬周內地矣并錄之以備一說

### 秉心塞淵

衛燬亦是中才不得援剛而塞齊聖廣淵例看塞如不變塞之塞有鬱而不舒斂而不放之意淵如深淵之淵有競然若臨凜然若隕之意蓋詩人謂熒澤餘燼不絕如綫公能守其儉素戰戰焉若危亡之踵其後衣大布冠大帛其秉心證佐歟先是戴嬌處州吁之難莊姜送之亦曰仲氏任只其心塞淵可以類言矣又駟之章云思無邪夫僖公用致成風委政季友三家爲孽與大東相終如其所云思亦僅思馬斯臧而已豈真能無邪者哉然文公星言夙駕其旣也駮牝三千僖

公去佞臣郭都閔農喜雨而彭彭伾伾之頌作民瘠而國肥  
百姓凋而庶物蕃吾未之聞也修馬政者當錄二詩日置坐  
右

沽酒市脯不食解

居平疑食不厭精二語與恥惡衣惡食語似相舛或曲解曰  
不厭精非與精期精至不厭也若爾則記者先作一精細觀  
窺聖矣何不云不厭糲耶蓋厭具厭足義食可精也不取足  
於精膾可細也不取足於細曲肱蔬水樂在其中是不厭樣  
子然則饘餼餒敗之戒何居曰惡食云者對精細而言惡也  
蔬糲之與饘餼餒敗遠矣因是而得沽酒市脯之說漢魯恭  
云孔子當周衰亂酒酤在民薄惡不誠是以疑而不酤云然

聖人眞不能忘情精細閒乎山梁之雉五步一飲十步一啄  
聖人脩然而作曰時哉時哉聖人渾身是一時字日用飲食  
任運騰騰有酒滑我無之則獨醒而已何必沽沽焉而食從  
酒起見也籩豆有踐無之則羹菜而已何必市市焉而食從  
脯起見也直從口腹際現出大解脫大自在法門有亦不拘  
無亦不管非聖人直下指點處乎客曰子言辨矣五柳先生  
於沽酒三致意焉名教繩之將無獲罪噫陶公者眞善學孔  
子者也公超然於是非評論之外以酒爲家直忘其我者也  
公不敢背長沙公討賊之意義熙後但書甲子江州刺史遺  
二十萬錢盡付酒家無贏者陶公之酒忠臣血也孝子泉也  
六經百世之糟醲而畸人韻士之靈液也奚其沽奚其沽猶

記十五年前戲作飲食之人論略曰人無輕視此飲食也必  
如五斗待詔然後不負薯蕷地黃必如天隨生然後不負未  
棘之杞未莎之菊必如上陪玉皇下陪卑田院之髯學士然  
後不負江瑤柱真一酒今有人焉視聽言動茫無自持始也  
人化而爲飲食簞食豆羹都延饑沫旣也飲食化而爲人其  
人卽食前方丈此腹負將軍矣每自閱之輒胡盧不休輒書  
沽酒說紙尾

### 內典中字義

佛典中本師見史記樂毅傳云樂臣公學黃帝老子其本師  
號曰河上丈人祖師見漢書丁姬傳易祖師丁將軍之玄孫  
居士見禮記居士錦帶及韓非子居士華喬又魏志管寧傳



胡居士賢者也侍者見國語展禽侍者曰若有殃焉在又漢書侍者李平眷屬見史記樊噲傳呂嬖媵屬注媵音眷長老見漢書近世之事語尙在長老之耳宰官見郭象莊子注大鵬之與斥鷃宰官之與御風同爲累物耳某甲見周禮鄭玄注若言某月某日某甲詔書出某物若干給某官某事又應劭漢官儀博士凡十四人其督郵板狀曰某官某甲保舉又魏志許攸呼曹操小字曰某甲卿無我不得冀州也布施見國語布施優裕供養出嵇中散集以酒色爲供養謂長生爲無聊煩惱出河上公老子注天道惡煩惱人心惡多欲幢字出方言翻幢翳也注所以自蔽翳也又西京賦云撫鴻幢東都賦云樹羽幢幢曹子建樂府云一舉必千里乘颺舉帆幢

按記蒟蒻字不見他書釋名曰蒟別也大書中央中破別也然則卽今之合同契也文心雕龍云券者束也明白約束字形半分周稱判書古有鐵券以堅信誓授記之說得此始自

綸字古有二音

閔康侯綸巾辨證據富有持論精覈張按古今人表冷淪一作零綸服虔云淪音鰥又鄭成公綸師古曰綸音工頑反左思吳都賦綸組紫絳李善注引爾雅綸似綸組似組爲證音古頑切太平御覽草部引爾雅云云張揖廣雅綸組絃綬也俱古頑切楊子法言孝至篇五兩之綸半通之銅宋咸曰綸青絲綬也司馬溫公云綸古頑切又音倫蘇長公洞庭春色賦翠勺銀罌紫絡青綸又雙鳧觀詩紛紛塵埃中銅印行青

綸坡自注姑頑反綬也綸字舊有二音郎瑛云倫巾韻同音  
近詩法所忌故讀曰關此語真足捧腹春秋時未有巾製當  
以綬而得名康侯所稱名綬則二音並存名巾則舍倫無適  
老吏之案不可易矣

蕭子雲玄圃賦縹青綸之萋析孫綽望海賦翠綸扇風而

繡舉

閱康侯

叩以字義

文選班孟堅幽通賦東鄰虐而殲仁兮王合位乎三五又謨  
先聖之大猷兮亦鄰德而助信漢書敘傳鄰皆作以古鄰字  
又漢隸衡立碑孫根碑俱有叩字釋文卽鄰字也然則鄰以  
叩三字一字也攷說文叩字解叩驚噓也从二口讀若謹徐

鉉云謹俗作喧非是况袁切此音義又與孟堅不同祭酒豈別有徵耶

升庵雜字誤訓

古音略云雒音鷓說文鷓鷃也詩七月鳴雒雒光武都洛陽去水而从佳以洛作雒按說文雒字訓云鷓鷃也從佳各聲盧各切鷓伯勞也古闌切鷓或從佳雒自鷓鷃自鷓不相混也爾雅雒鷓鷃音格今江東人呼鷓鷃又鷓鷃水鳥也似鷓而短頸腹翅紫白背上綠色江東呼烏鷓鷃伯勞似鷓鷃而大易林云鷓必單棲鷓必匹飛攷王伯厚詩異同亦無七月鳴鷓之文僅孟子注曰七月鳴馱楚辭鷓鷃先鳴注卽鳴鷓也升庵據臆說而改幽風何歟又泚字訓云音涉引楊雄韓

信銘身出項營按此語出班孟堅十八侯銘亦誤引

灑字

古音略灑字音書涉切引董仲舒頌舟輿浮灑草樵注灑浮  
掖之類此字諸書不收張按荊州記灑陽縣東有鳳岡江乘  
記木廬山上有鍾乳流出灑河上思村山弘君舉食檄云灑  
湖獨穴之鯉水經注江水左得湖口水通太湖又東合灑口  
水考兩漢地理郡國志俱逸之唯沈約宋書劉粹灑陽縣男  
又荊州有灑陽子相晉安陸人朱伺求分安陸東界爲此縣  
則縣勦宋時此前宜無聞也又溫公通鑑姚弋仲據灑頭胡  
三省注云此清河之灑頭也水經注郝昭營陳倉城成諸葛  
亮圍之今灑水對亮城是與昭相禦處也則南北有一灑水



矣

唐詩用字異音

唐人詩中字音有以十讀如謔相讀如廡帆蒲番檠俱作仄韻備見野客叢書餘冬序錄丹鉛錄筆叢說略諸書按韓退之縣齋詩雀鼠得驅嚇嚇音罅合江亭詩事往悲豈奈奈音儒岳陽樓詩軒然大波起宇宙隘而妨妨音訪遊青龍寺詩由來鈍駮之駮音矮酬崔四府詩貸借何患之借音迹東都詩新輩只潮評之評音病聯句詩誰與刪荒茸之茸音冗元微之東南行百韻詩徵俸封魚租封音俸疋臥詩一生長苦節三省詎行怪怪音乖又奔北翻成勇司南却是岡岡音歪嶺南詩聯游虧片玉洞照矣明鑿鑿平聲夜池詩高屋無人

風張幕張音漲春詩藥排難犯雪花乞擬連風乞音氣又苦  
思正旦酬白雪閒觀風色動青旂忠音四旦音丹又雁思欲  
迴賓風聲乍變新自注忠上聲白樂天和令狐相公詩仁風  
扇道路陰雨膏閭闔易平聲膏去聲長慶集元日對酒詩一  
碟膠牙餠膠去聲李義山石城詩簞冰將飄枕簾烘不隱鉤  
自注冰去聲陸龜蒙包山詩海客施明珠湘蕤料淨食自注  
料平聲可補諸書之逸

紅有四音

紅本音戶公切漢書女紅紅讀作工荀子大紅小紅亦作功  
用修引詩譜音人遷于故紅借作絳字漢書恩澤侯表有紅  
侯劉攽注云今有虹縣音降水經瀧水南經曲紅縣又借作

江字用矣

柏伯帛白百五字古通用

伯益班掾作栢益又左傳伯奮仲堪伯虎仲熊之伯人表俱作柏伯牙淮南子作百牙伯達汲冢作百達伯嚭吳越春秋作白喜王充論衡又作帛喜柏伯帛白百五字古通用也古樂府窮劫曲有誅夷白氏語正指州黎被難弇州辨其僞作云太子建有子勝後封白公非白氏王未究吳越始末耳若其辨留兵縱騎及秦未稱王二語自不可易

其時曾以... 未... 王... 情... 不... 居...

任太子... 行... 魏... 侯... 白... 公... 與... 白... 州... 王... 未... 侯... 侯... 侯... 侯...

侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯...

侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯...

侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯...

侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯...

侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯... 侯...

吹景集卷之九終

吹景集卷十

董斯張遐周著

烏程

韓昌箕仲弓訂

菴字義

相如賦菴藺軒芋拾遺記漢任末編茅爲菴後漢書皇甫規  
 持節監關中兵親入菴廬巡視三軍感悅注菴廬軍行宿室  
 也郭冲條孔明五事云敕軍門臥旗息鼓不得妄出菴幔魏  
 都賦比朝華而菴藹姚秦譯法華云猶在門外止宿草菴大  
 涅槃經文字品云菴者能遮一切諸不淨物於佛法中能捨  
 一切金銀寶物是故名菴楞嚴經阿那律見閻浮提如觀掌  
 中菴摩羅果翻譯名義集菴羅是果樹之名或云似奈此樹



開花花生一女國人歎異以園封之師子吼了義經長者女  
菴提遮大莊嚴經論云阿輸迦王以半菴摩勒捨施眾僧又  
根本說一切有部毘奈耶云有一毒龍於菴婆林依主而住  
維摩經菴羅園顏黃門家訓云並立草菴所署門字俱从艸  
皇甫謐逸士傳焦先結草爲庵廣雅云房廡廬庵廡舍也又  
云廡廡廡廡庵也劉熙釋名草圓屋曰蒲又謂之庵庵奄也  
所以自覆奄也字从宀儀禮疏高宗諒闇鄭云闇讀如鶉鷄  
之鷄闇謂廬也說文闇閉門也闇平聲李善文選注闇猶奄  
也古人呼闇與奄同則菴庵闇三字同一音義也闇之一字  
尤古用修引菴闇以爲晉人語按相如賦云菴闇軒芋楊殊  
誤楊又云元人印章有以盦字代菴字者按博古圖有交虬

蠡伯芟蠡說文蠡烏合切卽俗晉字也字與音俱不同史記載禹貢檠絲之檠作龠龠字似可代檠不可代菴爾雅菴有龜蒙之菴作龠則用修所引葦字或可代之黃魯直復云菴非屋不當從广按漢隸建寧三年衛尉衡方碑亦作庵字黃不見漢碑及劉熙張揖書耶所引焦光蝸牛廬亦繆陳壽志曰焦先曰瓜牛廬非光亦非蝸也

閤平聲漢何休讀李空同作康長公碑云長公自號曰已菴已菴者止於閤也北地精字學乃爾

按晉王沈傳云庵婪者以博納爲通濟然則此菴字又有容受義耶

俗語有所祖

俗語亦有所祖宋景文筆記戴埴鼠璞及王野客王伯厚何  
燕泉楊用修焦澹園顧太初諸君載之詳矣茲更得數十則  
吾里謂愚者曰不知鼎董爾雅釋草云藟藟董注似蒲而細  
不知藟藟者豈不辨菽麥意乎語不堅確者曰活脫釋草又  
云倚商活脫注草生江南高丈許大葉莖中有瓢正白活脫  
者豈靡然如草意乎熟習者曰熟脫法華文句記第一云但  
成佛時而熟脫之人來而避曰閃說文云陵不媚前却陵陵  
也失冉切閃當作陵手推曰塘方言云塘張也廣雅作控云  
距也物之鎔釋者曰洋劉熙釋名曰錫洋也糞米消洋洋然  
也擘橙橘之屬曰杙廣雅云杙音八擘也隱跡曰畔陳後主時  
謠云齊雲觀寇來無處畔手取物曰攄音查方言凡取物泥

瀆中謂之粗或作攄劉熙釋名云攄又也五指俱往也事穩  
曰妥帖杜詩千里初妥帖饋人曰作人情杜詩炬救作人情  
珠曰珠子相如賦明月珠子少年曰後生儀禮兄弟之後生  
者舉觶于其長座主曰老師子華子云天下老師先生端弁  
帶而說官之有職掌者曰管事李斯傳云管事二十餘年物  
之闕者曰匾崔融大禹碑螭書匾刻後漢東夷傳辰韓人生  
子皆以石押其頭令匾劉禹錫詩壓匾佳人纏臂金田畔曰  
田頭後漢王丹傳載酒殺於田頭大樹下所以閉門者曰門  
拴音范石湖桂海虞衡志門門橫關也不正曰差路差去聲唐  
詩云枯木巖前差路多貌不颺曰鄒搜大慧禪師自讚其像  
云鄒搜斂似天蒸棗以桐油入五色飾椽曰油音牖蔡襄茶

錄云珍膏油其面自注油去聲生子曰養韓詩外傳王季立  
而養文王扶持曰擡舉白樂天高荷詩亭亭自擡舉負而不  
償許而不予皆曰賴晉語曰已賴其地而又愛其實虛而少  
實曰空頭北史斛律金傳空頭漢合殺習氣曰毛病黃山谷  
刀筆云此荆南人毛病匠斲木而復平之曰鉋去聲元微之詩  
巨礎荆山采方椽郢匠鉋平聲牽船之索曰彈平聲子癸辛雜識  
云鍾會呼捉船索爲百丈趙氏注云百丈者牽船筏內地謂  
之宣音熱而不甚曰溫暾音吞樂天開元寺詩池水暖溫暾博  
戲者立一人司勝負曰頭家唐英華辭恁有戲擣蒲頭賦云  
鑿座中之奔北爲席上之司南溼飯口爛爾雅云搏者謂之  
爛音爛有所倚曰靠范政明岳陽風土記云江道回曲或遠



或近雖無風濤之患而常靠閣枇杷之枇音辟張祐詩生摘  
枇杷酸物之柔潤者曰滑撻東坡秧馬歌聳踊滑汰如鳧鷖  
公自注云汰音撻韓昌黎答張徹詩磴蘚澗拳跼注曰澗滑  
也音鬪姑舉一二以志其概按王周峽船具詩序云取竹之  
筋者破而用泉爲紉以續之以  
備其牽者謂之百丈弁陽以  
爲鍾會蓋襲杜詩注之譌耳

今人呼茶酒器爲斝邵康節詩大斝子中消白日小車兒

上看青天閱康侯

### 佛字有五音六義

佛字梵語具云三藐三佛陀簡而爲佛音符勿切佛者覺也  
大也按外典亦有此字異義異音吳越春秋計硯曰何順心  
佛命羣臣注云大也周頌佛時仔肩毛萇作符勿切云大也

鄭玄音彌言輔佛是任也與佛髀同音曲禮云獻鳥者佛其首畜鳥者則勿佛也注佛符勿反佛者振轉其首恐喙之害人也學記其施之也悖其求之也佛疏佛戾也荀子臣道篇云抗君之命以安國之危成國之大利謂之拂注或讀爲佛違君之意也楊子法言荒乎淫佛乎正注佛違也劉熙釋名轡佛也言牽引佛戾以制馬也又荀子非十二子篇云佛然平世之俗起焉注佛讀爲勃勃然興起貌一作彷彿之佛分勿切說文云見不審也古韻又作非律切與黻同音見詩韻輯略自傳毅曰西域有神其名曰佛萬德之鴻名一舉而餘音俱廢而不宣矣然張謂餘音餘義皆可以大覺攝之一中有多多中有一重重無盡何以名之佛者彌也刑賞之所不

及諸遐邇之所不及朗而舉其麤者猶能以因果輪轉之說  
惕人心而之善是王政翼也故曰彌也佛者拂也吾生也有  
涯而情也無涯順之則爲苦集二諦逆之則爲滅道二諦大  
涅槃梵行品云順流者謂凡夫人逆流者從須陀洹乃至緣  
覺大寶積經云我當逆流而行非順流者瓔珞經云鳩摩羅  
伽秦言逆流歡喜地須阿伽一波秦言逆流離垢地須那迦  
秦言逆流照明地四分律藏佛說偈云逆流迴死生深妙甚  
難解首楞嚴云逆生死欲流反流窮根至不生滅又云旋汝  
倒聞機反聞聞自性流不逆聞不反生滅心不得而寂也故  
曰拂也佛者勃也人人有如來藏長夜無明若或覆之罽道  
一朝若或起之古佛齊肩興也勃焉故曰勃也佛者髴也如

水中月如熱時燄無縛無著不有不空故曰鬚也獨黃香九宮賦銀佛

律以嶺游此義不可強解

拘有七音句有六音

拘之為拘樓也夫人而知之也曲禮云必加帚於箕上以袂

拘而退注拘音古侯切荀子溝猶贅儒注溝讀為拘拘音寇

又音抽莊子云吾處身也若撇株拘注其俱反與癩同音荀

子哀公篇古之王者有務而拘領者矣注務讀為冒拘與句

同曲領也說文句七遇切句曲也本作叫漢書地理志武始

漳水東至邯鄲入漳又有拘澗水東北至邯鄲入白渠應劭

曰拘音矩夫然則拘之音有七也句之為句逗也夫人而知

之也左傳公伐邾取須句又申句須下伐之漢書地理志之

冤句俱音劬左傳句芒句龍句餘句無句瀆禮記句者畢出  
倨中矩句中鉤考工記倨句外轉句兵裨柔地欲句庇謂之  
句弓爾雅句如羽喬九章算術有句股俱音鉤詩大雅敦弓  
旣句旣挾四鏃注句古豆反說文作穀正義云旣句是引滿  
之時也又華陽國志王平句扶張翼廖化並爲將軍時人曰  
前有王句後有張廖廖音力救反莊子屨句屨者知地形注  
句音矩又句漏漢地理志作苟漏据此句當音苟夫然則句  
之音有六也

趙字三音九義

趙音肇趨也少也久也冬日之衰夏日之盾此以氏而名之  
者也玄鳥司分伯趙司至此以鳥而名之者也周頌其笠伊



糾其縛斯趙音直了反刺也此以縛而名之者也荀子箴賦  
頭銛達而剽趙繚者耶注趙讀爲掉掉繚長貌言箴掉尾而  
繚也掉徒弔切此以箴而名之者也方言云牀秦晉之間謂  
之扛南楚之間謂之趙此以牀而名之者也廣雅云趙召也  
此以音而名之者也劉熙釋名趙朝也本小邑朝事大國也  
此以邑而名之者也

趙字又有一義爾雅休無實李郭璞注一名趙李此以木  
而名之者也

康侯

### 乙字義

乙字本義見前乙乙解中乙之名其候也鴻之乙也

越人以  
爲鴻楚

人以燕之乙也

月令孟春仲春其日甲乙正月鴻雁  
來二月玄鳥至一言其去一言其來

乙之放

其文也魚之乙也

爾雅魚腸謂之乙內則魚去乙魚腸如篆書乙字

虎之乙也

虎威骨如

乙字篆書

甲之乙之之乙也循其次而乙焉者也

如令甲令乙甲榜乙榜之類

塗之乙之之乙也

疾書多塗乙乙者乙注其旁也今人字有脫而注之者作乙形

貌其形而

乙焉者也一字而數義具焉者此類是也

說文乙字徐鍇云燕也其形下曲與甲乙字少異甲乙之

乙音壹此音軋然釋名云甲孚也乙軋也律歷志亦以軋

為乙則兩字本可互用班掾識字豈不如徐楚金乎

黨有三音六義段有四音四義

君子不黨之黨多朗反又讀作儻他朗反漢書黨可僥倖又

音掌左傳哀二十一年侯于黨氏之溝又借為讜言之讜荀

子非相篇實博而黨正注讜同汲冢書祭公黨言亦作此解

又廣雅云黨所也古以中原爲上黨見吳語子胥云上黨之國吾攻而勝之不能居其地又公羊文十三年往黨反黨注時也又方言黨曉哲知也楚謂之黨郭璞解云黨朗也曉寤貌又釋名云五百家爲黨黨長也一聚之所尊長也段古下切从皮从二古文假借之假瑕玷之瑕昭假之假皆作段段與段不同段从殳詳見轉注古音略按考工記攻金之工築冶鳧棗段桃段音煨此又古音略所未載也

芳苻字義

汲冢書如木旣顛厥巢其猶有枝葉如草旣薙厥藂其猶有綴芳孔晁注亦無音釋南齊朱碩仙善歌吳聲獨曲武帝出遊鍾山幸何美人墓碩仙歌曰二憶所歡時緣山破苻苻山

神感儂意磐石銳鋒動宋書羊玄保傳春種竹木雜果爲林  
芴梁書王僧辯傳耀軍城東隴上芴除草芴亦不曉芴音按  
法華文句記第一卷云初記繁芴故須云削注芴如蒸切陳  
殷相積也冲虛博物紀趙襄子事云芴一作芴則知芴與芴  
一字也張處度注云芴而任反草不翦曰芴又芴之與動本  
非一音詩芴菽旆旆爾雅云戎菽謂之芴菽又蘇桂芴俱音  
稔據此芴當叶宄矣亦可補古音略

汲冢語升庵所引者張按汲冢書如木旣顛二語在嘗麥  
解中無如草二語商誓解云爾百姓獻民其有綴芴其語  
與升庵所引亦不倫楊合二解爲一誤憶耶抑別有祕本

耶

眊字義

魏略蜀先主好結眊韻會眊而志切一曰績羽爲衣一曰兜  
鍪上飾孔明與兄瑾及孫權書俱有白眊字備載楊去奢輯  
諸葛書按晉語卻叔虎被羽先登遂克之韋昭注被羽者以  
烏羽繫於背若今將軍負眊矣韋昭亦吳人季漢時當有此  
製太平御覽引庾翼書今致兜鍪白眊自副雙旛眊一副又  
朱漆鍪二十張鍪所  
諫切絳碧畫幡黑眊自副陶侃故事云奉獻  
金鍪白眊四枚通鑑齊永明中李叔獻獻純銀兜鍪乃孔雀  
眊宋書竟陵王誕傳須官髮爲稍眊朱超石傳白眊旣舉超  
石赴之北史蠕蠕傳白眊赤漆槩十張俗說謝安年十三時  
便有名譽慕容垂餉謝白狼眊一雙吳志甘寧挾持弓弩負



眊戴鈴曹操與楊彪書今贈足下十鈴眊一具隋書禮儀志

云長槊楯弩及甲眊各稱兵數又云羽葆眊鼓吹悉改著進

賢冠外給絲眊鼓吹著武冠又煬紀云大業三年車駕發江

都盛修儀仗課州縣送羽毛百姓求捕之網羅被水陸禽獸

有堪斃眊之用者殆無遺類何承天戰城南篇云虎騎躍華

眊旋又劉苞詩云梁簡文帝虎窟山寺詩飄飄旌眊懸梁元

帝燕歌行金羈翠眊往交河升庵以此為庾信詩殊誤又武

馬梁譜序云翠隋煬帝詩采眊分脩廊又劉孝儀孝威此所

云羽衣鑿節者非耶又按漢魏故事云若與外國節皆用赤

黑為眊異于常節後漢光武紀持節北渡河注節所以為信

也以竹為之柄長八尺以旄牛尾為其眊三重西南夷傳黃

金旄牛眊顧野王曰眊結毛爲飾也卽今馬及弓槊上纓眊也博雅云眊眊屬也沈約吐谷渾傳論云金屬氈眊非用斯急南齊禮志云上轡十二旒金塗龍銜火燄幡眞眊二轄飛幹幡用赤油金有紫眞眊繁纓金塗紫皮紫眞眊橫在馬前指南車竿縣雜色眞孔雀眊西京雜記五色流蘇帶以綠紋紫綬每好風日幡眊光影照曜一殿資治通鑑隋煬帝時四方散樂大集舞者鳴環佩綴花眊後魏書島夷傳繡帷鏤帶重鈴疊眊梁書陸襄傳入山采藥拾得五色幡眊此數種又出於羽衣兜鍪之外矣升庵引東京賦髣髴被繡以爲證張掖李善注髣髴頭茸騎也漢書羿爲髣髴頭

又酉陽雜俎引北齊迎南使儀云儀

仗百餘人翦綵如衣帶白羽間爲攷馬縞古今注云秦皇東

清髣髴髮絳袍帽凡五色

隨髣髴色

巡猛獸突前有武士戴狸皮白首獸畏而遁遂軍仗儀服皆  
作狸頭以威不虞狸頭卽髦頭也乃玄中記及摯虞決疑要  
注所載髦頭與縞說互有同異惟張茂先云壯士怒髮踴衝  
冠義取於此張公語差爲得之徐爰云熊皮冠謂之髦頭審  
爾則髦自屬皮冠眊自屬羽飾鬣髦二物李參軍槩以髦頭  
茸騎釋之誤矣

曹操書十鈴眊古文苑作鈴苞一具當以徐堅爲正  
按魏文帝列異傳云秦文公時梓化爲牛以騎擊之騎不  
勝或墮地鬣解被髮牛畏之入水因是置旄頭騎使先驅  
參軍或據曹說耶

眊音二見北堂書鈔孔雀眊注獨十誦律第四十卷眊衣

注音而容反又曹憲廣雅注以爲音毛未知何出

又眊字義

筆亦可名眊魏辛毗云御史簪筆以奏不法如今者直備位  
眊筆耳隋志今文官七品已上通眊之是也貂亦可名眊董  
巴輿服志云內常侍加黃金附蟬眊尾謂之惠文冠隋志云  
侍臣眊豐貂是也拂亦可名眊張敞晉東宮舊事云皇太子  
納妃有白眊拂二枚南史婆利國主坐金高坐侍女持白眊  
拂及孔雀扇是也珠亦可名眊北史吐谷渾傳夸呂椎髻眊  
珠以阜爲帽是也色絲亦可名眊梁書貞惠世子傳以五色  
眊辮鮑泉鬚是也烏羽俱可名眊沈佺期詩鸚鵡林中彩眊  
分柳絮荻花亦可名眊內典翻譯名義集云兜羅絲亦翻楊

華或稱兜羅眊梁元帝春荻詩云非秋無有眊未燒不生煙是也藤亦可爲眊齊民要術云眊藤大小如荦蒿蔓衍人采取剝之以作眊是也据服虔通俗文曰毛飾曰眊則凡絲羽華草之下垂者並可以眊名矣眊之義於是乎大備

眊筆崔豹古今注作珥筆

爹有三音姐有六音

爹字今作陟邪反廣雅云爹箸父也大可反南史所稱始興王人之爹赴人急如水火其證也程大昌引孫愐唐韻羌人呼父曰爹音遮則爹有三音矣姐子野反廣雅云姐母也案字書姐卽𡗗字子我反漢書楊雄傳藉蕩姐之場後漢書西羌傳有封養牢姐多姐多音先廉反勒姐注音紫升庵轉注略又



音租媿姐女態也字本作媿省作姐引嵇康詩恃愛肆姐不  
訓不師張按說文媿字訓女媿也將豫切李善注稽康幽憤  
詩亦引說文音子豫切升庵以嵇詩姐字音租殊誤然則姐  
有六音矣

蓮有三音苴有十五音敦有十二音

蓮七賢切漢地理志蓮勺之蓮音輦廣雅鳶尾鳥蓮射干也  
蓮音所夾反苴有十四音見升庵澹園所引按荀子大略篇  
云藍苴路作似知而非注苴讀爲姐慢也趙蕤注長短經知  
人篇曰姐者類智而非智姐伺也才野切此音二先生所未  
引者則苴有十五音矣敦有九音見筆乘按荀子禮論篇云  
憚詭其所敦惡之文也注敦讀爲頓頓困躓也筆乘載爾雅

敦工之敦音鈍按爾雅太歲在子曰困敦之敦音頓工一成  
爲敦工之敦音惇如覆敦者敦工之敦音堆未聞有音鈍者  
筆乘不知何據又左傳帝鴻氏有不才子謂之渾敦敦音徒  
本反莊子越人斷髮文身司馬彪本斷作敦則敦又可音斷  
此三音又筆乘所遺者然則敦有十二音矣

### 佳俠函光

悼李夫人賦曰佳俠函光孟康曰佳俠猶佳麗也陋甚說文  
云佳善也俠俤也又釋俤云使也停云止也俤停俗從女此  
二字極狀輕颺之態廣雅云俤佺遊挑俠也古任俠遊俠亦  
取輕佻不檢義賦中云菱苒音綏俤風縹姚愈莊南華經姑  
射神人吸風飲露洞冥記帝嘗以衣帶縛麗娟之袂閉旋重

幕恐隨風而去也張平子南都賦儼才齊敏高唐賦湫湫如  
風洛神賦驚鴻遊龍流風迴雪謝康樂江妃賦飄翰凌煙皆  
俠字注脚俠之一字畫家所云逸品也郊祀歌亦云被華文  
則露縠曳阿錫佩珠玉俠嘉夜茝蘭芳澹容與獻嘉觴俠嘉  
卽佳俠也武皇漁色真有神解楊子雲亦是箇中人方言云  
凡好而輕者謂之娥或謂之媼或謂之姣美人不俠必不能  
佳函光者卽所云神光離合也明君之豐容靚飾太真之傾  
國名花僅可供肉眼賞鑒子瞻云短長肥瘠各有態玉環飛  
燕誰敢憎猶未是品花具眼

子建樂府用寒字

曹子建樂府炮鼈炙熊蹯宋本作寒鼈李善注韓羊韓兔韓

雞本韓國所爲也韓古寒字通此解殊強按子建七啟又云

擧芳蓮之巢龜宋本作寒芳苓李善引鹽鐵論羊淹雞寒又

云寒今臍肉也臍不曉何物侯鯖錄及靖康緗素雜記二書

引廣韻之煮魚煎食曰臍資暇云清肉謂之寒皆未甚悉按

臍古鯖字一作鯖齊民要術有臍魚鮓法又有五侯臍法云

用食板零拌雜鮓肉入水煮如作羹法儀禮士昏禮云大羹

清在爨又設清於醬南注清去急反煮肉汁也然則有汁者

卽謂之寒不必更生別解矣

六經正誤云清從肉不從日作清者非

若用修晦

伯引崔駰傳之雞寒曹植文之寒鷓說殊未暢考雞寒出崔

駰博徒論楊陳俱云駰傳亦誤也若寒之與韓自不可通左

氏世本以韓哀爲寒哀漢書古今人表以寒泥爲韓泥或一

時傳寫誤耳朗可韓厥可寒乎

倩靚字義

魏志陳思王曰顧當面試奈何倩人倩所見反說文倩美也  
逸詩巧笑倩兮漢人呼魏無知爲魏倩東方先生字曼倩荀  
氏六子皆字倩東齊人以婿爲倩皆與假手義無關按廣雅  
云招命靚招呼也又云令召靚也靚才性反曹憲注云屈靚  
之靚今云靚師僧者是矣倩人當爲靚人王融曲水詩序靚  
妝藻野衮服縵川本相如太沖二賦郭璞曰靚妝粉白黛黑  
也未盡其趣靚者召也言極其豔節目挑心招所謂冶容誨  
姪也班婕妤好賦云眇眇兮靚處亦同靚召之義蓋團扇被捐  
以後幽憂餘生魂魄眇眇如有所失靚處者猶楚些之招魂



願復返其故處也倩之爲靚審矣若甘泉賦之暗暗靚深王  
莽傳清靚無塵之靚自當以靜義解之可強一哉

愁有四音

愁本音鋤尤切楊雄著畔牢愁音曹憂也文子曰肉凝而不  
食酒澂而不飲外束其形內愁其德注愁音囚易晉如愁如  
鄭玄曰變色貌陸德明釋文愁音子小反與悄同

升庵以爲  
畔牢愁之

愁音曹卽俗槽字按韻  
書槽自音惊楊說非也



次景集卷十一

董斯張遐周著

烏程

韓昌箕仲弓訂

荀子中字義略記

荀卿子閔肆蜿蜓極文章之變王霸正名諸篇真千古奇作  
其敗處獨性惡一論如唾在喉閒喀喀不能出亦遁辭知其  
所窮也然何可以一瑕掩羣玉哉歐公得其一體遂名大家  
今人多高閣置之其篇中字義亦多不解者予故筆之如左

參省

即三省勸學篇

螾之為蚓跪之為足

螾無爪牙之利蟹六跪而二螯

梧之為臄

梧鼠五技而窮

端之為喘

端而言蠕而動注端讀為喘

則之為財

口耳之閒則四寸耳注則當為

財

噴之為讚

問一而告二謂之噴即讚字

楛之為沽

問楛者勿告也注楛讀為沽儀禮有沽功

鄭玄曰 扁之為辨 扁善之度 提慢之為媿慢 勃亂提慢注爾

麗也 緩也 提之為提 難進曰提 偷之為輸 偷懦轉脫注偷當 供冀

之為供翼 行而供翼注 惕之為蕩 惕悍而不順注惕與 束之

為簡 血氣不情束理也 縛紕之為搏黜 不苟篇恭敬縛紕同 慢

之為慢 寬而不慢 域之為惑 受人之域域注 鮐之為鮐 儻鮐注當

作鮐榮 祛之為祛 祛於沙注 錯之為措 小注錯之過 鉛之

為沿 鉛之重之注鉛 陶之為逃 陶誕矣盜 幾之為豈 幾不甚

注幾讀 姚之為遙 功盛姚遠 鞫之為拘 鞫錄疾力 御之為迓

為迓 旅逆旅也 麋之為眉 面無須麋古 牟之為眸 堯舜參

姚之為妖 美麗 府之為俯 府然若渠 溝之為拘 溝猶督儒溝

也猶猶豫也 漢書作 詛之為妖 詛怪 離蹤之為離繩 離蹤而

區翳非十二子篇

崑當為繩離繩謂  
離于俗而步去也  
肆之為肆  
肆然肆然注當  
紫之為紫  
紫然

或曰與孳同  
神禫之為神禫  
神禫其詞  
啗之為啗  
伏而啗天

上擅之為禫  
儒效篇鄉有天下今無天下  
謫之為商  
謫德而定次注

商施之為移  
充虛之相施易  
粹之為碎  
舍粹折無適也  
伸之

為身  
偃伸而好升高  
挾洽之為挾洽  
盡善挾洽之謂  
閑之為

閑  
外闔而不閉今  
疑恁之為疑恁  
無所疑恁注疑  
暗之為暗

暗然若合符  
節注暗暗同  
反之為販  
反貨而為商賈  
澹之為贍  
王制篇物

必爭注  
干之為斲絃之為蚘  
曾青丹干紫絃魚鹽注  
詩商之

為誅賞  
修憲命審詩商注  
擊之為覲  
偃巫跛擊  
剗之為專  
聲

剗天下之  
株襖之為朱袞  
株襖衣冕注株古朱  
敖之為熬  
天

美矣並上  
讀為熬  
噴之為噉  
噴菽飲水  
坊之為榜  
坊坊如河海  
萃之為

讀為熬  
噴菽飲水  
坊之為榜  
坊坊如河海  
萃之為



頤勞苦頤萃宛夏不宛暘暘然兼覆午之

為迂午其軍取其旗壽于旗翼注旗盧盧屋

讀為將注讀為迂部王霸篇名聲部之為當為箕二星也鐫武王以部憚憚之為

坦憚憚非變厭厭之為駢駢焉有千歲之玩玩之為玩游玩之修

佻佻其期注關關內之開開納同臣道篇路路直

之為議兵篇路直者也注路暴露露也直當為袒新序作落單印印之為仰上不足印

軸冠軸帶劍之為注胄同狃狃之以慶招招近之招招延近

幕選注近契契之為挈挈契司詐權謀傾覆注曠曠之

為曠敬謀無曠蘇蘇刃注之為讀曰倭倭之為掘溝池不掘字薄薄之

為毫湯以薄武瀉瀉之為鎬鎬以高刑刑之為形疆國篇刑范賁賁之為憤

賁賁以離上養疾養緩急匡匡之為廷正論篇偃丞跋

玄之為眩上周密則下疑怪嬰之為澡纓艾畢之為艾鞞對

履之為紉履古有象形墨幪怪嬰其艾畢非對履注搔嬰當

同艾蒼白色也對當為紉泉也有之為又夫有誰與讓曼之

方孔反或作蒯麤蒯之菲也有之為又夫有誰與讓曼之

為萬翠之為澤曼而饋代翠而食注鉅之為遽是豈鉅知見

哉注鉅與遽同枯之為辜枯磔注嚴之為儼嚴然而好說槌貌之為

邃貌禮論篇疏房槌貌注末之為臂蛟鞞絲末注膈之為擊

尙拊之膈注附樂穀之為穀臧穀注穀讀為鬪穀於菟裏之

為理解蔽篇而宇宙裏俞之為愈俞疾之福注廣之為曠廣

能棄之矣注邑之為吧無邑憐之心錄之為綠性惡篇文王

廣當為曠驩之為驪驪文如博基入駿之一也獨鹿之為屬鏤銀之

為垠見成虛之為居見成鎗鎗之為鎗鎗疇菜之為疇菑菜

為菑謂輶輿輻也言矯揉直木為牙至于輶輻皆敝而  
規曲不反其初所謂三材不失職也幬幔輶之革也 甌夷

之為汙邪喆之為湏並宥之為右宥坐 卑下裾拘之為卑下

倨句主量之為注量淖約之為綽約九蓋之為北蓋九蓋皆繼注九

當為北蓋音盍扇戶也皆繼謂其材木斷絕相接繼也並上 放舟之為方舟子道 怨財之

為蘊財哀公篇

### 紀事語不同

列子與張華博物志並紀趙襄子狩中山事而文微不同列

子云趙襄子率徒十萬狩於中山藉芴博物作芴 燔林扇赫百里

有一人從石壁中出隨煙燼上下眾謂鬼物火過徐行而出

若無所經涉者襄子怪而留之徐而察之形色七竅人也氣

息音聲人也問奚而處石奚道而入火其人曰奚物而謂石

奚物而謂火博物云有人從石壁中出隨煙上下若無所經  
涉者襄子以爲物徐察之乃人也問其奚道而處石奚道而  
入火其人曰奚物爲火三書均紀一事也而命辭簡遠故當  
茂先著勝地冰寒於水詎虛語哉又越絕中紀李園事與國  
策史記微別賈誼新書引吳越事亦小異左國諸書其詞之  
瓌瑋奇怪眞可益後人膽智并錄之越絕云昔者楚考烈王  
相春申君吏李園園女弟女環謂園曰我聞王老無嗣可見  
我於春申君我欲假於春申君我得見於春申君徑得見於  
王矣園曰春申君貴人也千里之佐吾何託敢言女環曰卽  
不見我汝求謁於春申君才人告遠道客請歸待之彼必問  
汝汝家何等遠道客者因對曰園有女弟魯相聞之使使者

來求之園才人使告園者彼必有問汝女弟何能對曰能鼓  
音讀書通一經故彼必見我園曰諾明日辭春申君才人有  
遠道客請歸待之春申君果問汝家何等遠道客對曰園有  
女弟魯相聞之使使求之春申君曰何能對曰能鼓音讀書  
通一經春申君曰可得見乎明日使待於離亭園曰諾旣歸  
告女環曰吾辭於春申君許我明日夕待於離亭女環曰園  
宜先供待之春申君到園馳人呼女環到黃昏女環至大縱  
酒女環鼓琴曲未終春申君大悅留宿明日女環謂春申君  
曰妾聞王老無嗣屬邦君君外淫不顧政事使王聞之君上  
負於王使妾兄下負於夫人爲之奈何無泄此口君召而戒  
之春申君以告官屬莫有聞淫女也皆曰諾與女環通未終



月女環謂春申君曰妾聞王老無嗣今懷君子一月矣可見  
妾於王幸產子男君卽王公也而何爲佐乎君戒念之五日  
而道之邦中有好女中相可屬嗣者烈王曰諾卽召之烈王  
悅取之十月產子男十年烈王死幽王嗣立女環使園相春  
申君相之三年然後告園以吳封春申君使備東邊園曰諾  
卽封春申君於吳新書云闔閭沒而夫差卽位乃與越人戰  
江上棲之會稽越王之窮至乎喫山艸飲腑水易子而食於  
是履璧戴璧號唵告毋罪呼皇天使大夫種行成於吳王吳  
王將許子胥曰不可吳王不忍縮師與成還而謀伐齊子胥  
進爭不聽忠言不用越得成稱善累德以求民心於是上帝  
降禍絕吳命乎直江君臣乖而不調置社稷而分裂高臺榭

而掩敗則犬羣噪而入淵彘衡菹而適奧燕雀剖而蛭虵生  
食蘊菹而蛭日浴清水而遇蠆伍子胥見事之不可爲也何  
籠而自投水自抉而望東門身鴟夷而浮江懷賊行虐深報  
而殃不辜禍至乎身矣越於是果逆謀負約襲剗夫差兼吳  
而拊闔閭事濟功成范蠡負室而逃五湖大夫種車裂回泉  
語云文士出奇無窮信哉

補馮北海詩紀古語古諺

凡詩所已  
載者不入

法苑珠林載求離牢獄經云阿育王告諸大臣吾昔曾聞古  
昔諸賢有此諺言夫人有福四海歸伏盡其德薄肘腋叛離  
韓子引諺曰爲政猶沐也雖有棄髮之費而有長髮之利也  
吳越春秋范蠡引古人曰居不幽志不廣形不愁思不遠計

倪引傳曰失士者亡得士者昌越絕書石買曰衞女不貞衞  
士不信又子貢引傳曰寧失千金毋失一人之心計倪引傳  
曰直能三公外傳記引人之將死惡聞酒肉之味邦之將亡  
惡聞忠臣之氣又引傳曰知始無終厥道必窮龍魚河圖斷  
鼠祝云付敕屋吏制斷鼠蟲三時言功鼠不敢行劉向新序  
引語曰桓公任其賊文公用其盜又曰明主任計不任怒闇  
主任怒不任計計勝怒者強怒勝計者亡說苑引語曰有昭  
辟雍有賢泮宮田里周行濟濟鏘鏘又語曰知命者不惑又  
孔子曰吾聞好諫者思其君食美者念其親又引語曰中不  
正外淫作鹽鐵論引語曰未見君子不知僞臣又語曰貨賂  
下流猶水之流下不竭不止又語曰見機不遂者隕功華陽

國志云蜀有昇仙橋送客觀司馬相如初入長安題其門曰  
不乘赤車駟馬不過汝下漢官儀引里諺云仕宦不止車生  
耳桓譚新論引語言三歲學不如三歲擇師搜神記引古語  
曰赤尾三七陳武傳引里語云都亭鼠數聞長者傅子引諺  
曰已是而彼非不當與非爭已非而彼是不當與非平長沙  
耆舊傳云虞授字承卿說易不殆諺曰不讀經視虞生華陽  
國志云趙孟字長舒補尚書都令史善清談有國士風面有  
疵點曹事不決孟一言乃定時人語曰事有變問疵面法苑  
珠林載竺道生與叡公同學齊名時人評曰生叡發天真嚴  
觀窪流得慧義彭亨進寇淵干默塞抱朴子引諺曰苦如薏  
又諺曰子不夜行則安知道上有夜行人集仙錄王妙想傳

引古語曰修道如初得道有餘佛圖澄傳引古語不曰敬乎

幽而不改不曰慎乎獨而不忘陸璣詩疏引俗語曰澀如杜

顏氏家訓引梁世謂曰下車不落則著作體中何如則祕書

齊民要術引諺曰溼耕澤鋤不如歸去又曰頃不比畝善謂多

惡不如少善也又曰椹釐釐種黍時又曰欲得穀馬耳初角切言苗生也馬

耳則鏹又曰迴車倒馬擲衣不下又曰以時及澤為上策又

曰家貧無所有收牆三四堵蓋言秋牆堅實土功之勞一時求逸亦貧家之寶也又曰

立秋葉如荷錢猶得豆又曰與他作豆田斯言良美可惜也又曰魯

桑百豐錦帛言其桑好功省用力又曰湖豬肉鄭稀熟又曰種瓜黃臺

頭又論耕赫曰左右過鋤一萬餘株又曰蔥二壺四又曰韭者

嬾人菜又曰正月可栽樹又論種榆曰不剝沐十年成轂又



曰富何卒耕水窟貧何卒亦耕水窟言下田能貧能富也又曰菱蕤葵

日乾醬言其美又曰東家種竹西家治地為滋蔓而來生也又論養馬

日旦起騎穀日中騎水斯言旦飲須節水也又曰金齋玉鱸水經注云

羅縣西至江津其中有九十九洲楚諺曰洲不百故不出王

者又云洛水東逕安漢縣謂之縣水自上諸縣咸以灌溉故

語曰縣洛為汶沃荆楚歲時記云正月十五日作粥禱之加

以肉覆其上登屋食之呪曰登高糜挾鼠腦欲來不來待我

三齋老異物志云古賁灰即牡蠣灰也與扶留檳榔三物合食乃

善也俗曰檳榔扶留可以忘憂海異志引諺曰楊桃無燧一

歲三熟宋明帝自敘引河洛讖曰靈曜豫見東南隅劉敬叔

異苑引諺曰揚州青是鬼營青清谿也宋書庾炳之傳引語曰不

癡不聾不成姑公隋圖經集記義州益春秋時白翟也其俗

語云丹州白室

卽白翟語譌耳

晉釋道安二教論引諺曰紫實味朱

狂斯濫哲又高僧傳云釋道傑歷遊講肆觀略同異凡經六

載咸陳難擊故并州語曰大頭傑難人殺又釋神照嘗往鄴

聽說大乘論一徧無遺時人語曰河南一徧照英聲不徒召

又釋法上善機問好徵覈而形色非美故時人諺曰黑沙彌

若來高座逢災又徧洞算數明了機調故時人語曰京師極

望道場法上釋靈裕精爽弘瞻理相兼通故鄴下諺曰衍法

師伏道不伏俗裕法師道俗俱伏王朗貧窶語引諺曰魯班

雖巧不能爲乞句者顏曹子建集引諺云相門有相將門有

將

補詩紀雜歌謠辭

載詩所者不入

張按春秋考異郵云龍門之下血如江時人謠曰五侯之鬪  
血成江劉子政說苑引越人擁楫而歌曰濫兮杼艸濫兮昌  
柎澤兮昌州州諶州焉乎秦胥胥縵予乎昭澶秦踰滲悝隨  
河湖鄂君曰吾不知越歌子試爲我楚說之於是召越譯乃  
楚說之曰今夕何夕兮云云今詩紀中僅錄楚說不存越歌  
若爾則饒歌之妃呼豨鐸舞曲之樂邪邪巾舞曲之何何吾  
吾及古笙詩有聲而無辭如新宮由儀之類并其名亦可刪  
大非存古之義矣又楚莊王與晉戰勝之築五仞之臺臺成  
而觴諸侯諸侯請爲觴乃仰而曰將將之臺窅窅其謀我言  
而不當諸侯伐之高僧傳云齊南海荆山釋法獻居延祥寺

後入藏薇山剏寺成後有兩童子攜手來歌云藏薇有道德  
歡樂方未央釋慧約姓婁氏年十二始遊於剏遠會素心多  
究經典故東陽謠曰少達妙理婁居士隋書屈原以五月望  
日赴汨羅土人追至洞庭不見湖大船小莫得濟者乃歌曰  
何由得渡湖晉起居注云咸康三年河北謠曰麥如土殺石  
虎後魏略云孝文帝南巡至新野臨潭水見菖蒲花乃歌曰  
兩菖蒲新野樂遂建兩菖蒲寺以美之又秦載記太史令郭  
磨言於興曰起兵如流沙死者如亂麻我馬悠悠會隴頭鮮  
卑烏丸居不安按沙與麻悠與頭丸與安俱一韻意當時嘗  
有此讖耶附記

詩紀漳于髡田者祝引史記及荀子注二則矣乃劉向引

淳于云蟹螺者宜禾滂邪者百車傳之百世洋洋有餘語  
與二書復小異詩紀載雜曲歌辭逸引寶誌十二辰歌按  
此歌載傳鐙錄何得言逸耶又莊周歌曰夫通性命者以  
卑及尊云云按此條出萬機論御覽所引本蔣濟駁莊周  
語也以爲漆園歌大誤

### 鼻子鼻祖

說文云人之首子謂之鼻子楊子雲反騷云或鼻祖於汾隅  
注鼻始也按方言云囂之始生謂之鼻人之始生謂之首不  
應自抵牾若此豈輶軒之語雜以後人附益者耶

### 寒具

升菴引齊民要術并食經證寒具張按周禮曰朝事之籩鄭



司農注朝事謂清朝未食先進寒具口食之饜也服虔通俗

文云寒具謂之餠桓譚新論曰孔子匹夫耳而卓然名著天

下莫不以牛羊雞豚而祭之下及酒脯寒具致敬而去則寒

具不始桓玄時明矣升菴又引林可山云楚辭糗粢蜜餌有

餠餽糗十月閒鑪餅也蜜餌七夕蜜食也餠餽寒食寒具

也非是按方言云餠謂之餠餽注乾飴王逸楚辭注糗粢環

餅也餠餽說文作糗粢糗餅吳謂之膏環亦謂之寒具賈勰齊

民要術云膏環一名糗粢細環餅一名寒具膏環用秣稻米

屑水蜜溲之強澤如湯餅麩手搦團可長八寸許屈令兩頭

相就膏油煮之環餅以蜜調水溲麩令餅美脆入口即碎如

凌雪賈說與王許說小異據賈說大者名膏環小者名寒具

名二實一卽楚辭之糗糒也今人寒食設糗都名之爲寒具殊繆若以菰葉裹黍何至遂流書畫耶高似孫緯略引坡詩爲捻頭捻頭環餅當時方言不可曉

李時珍本草綱目引證極覈可參看

### 徊字韻腳

徊字韻腳升菴拈徐徊從徊徊徨遲徊徠徊四則胡元瑞云數語惟遲徊當行甘泉賦回回徨徨漢書文選俱非此徊字考文選宋本實作徊徊非回也元瑞何以駁之楚辭吾思儻徊以娛憂兮又奄低徊兮京止柳惲答神滅論啟云祇誦環徊永用懸解二君竟失之耳目之前大是敗闕

三輔黃圖昭帝

廟名徘徊非從徊揚誤又徊字亦可單用吳越春秋云禹北過寒谷徊崑崙眞誥右英夫人詩左徊青羽旗

### 趙李辨

阮公詩趙李相經過顏延年以爲飛燕李夫人劉須谿云安

知非實有此人不必求其誰何也升菴引谷永傳小臣趙李

從微賤尊寵

舟州亦如此讀

又言卽趙季李款二人皆陽翟大俠奔

州引谷永傳爲趙李報德復怨語又云趙飛燕李平皆成帝

所幸婕妤然不應與婕妤好遊從張考谷永傳帝數爲微行多

近幸小臣

句

趙李從微賤尊寵

句

又云許班之貴傾動前朝

女寵至極不可上矣今之後起什倍于前驕其親屬假之威

權從橫亂政刺舉之吏莫敢奉憲主爲趙李報德復怨反除

白罪建治正吏前云許班後云趙李非指婕妤何所指耶報

德復怨謂趙李之親屬假威亂政妄殺無辜主其事者有所

脇反除其明白亂政之罪而羣吏有持正者寧建議劾治之

若爲趙李復怨也又孟堅敘傳云班婕妤借養東宮進侍者  
李平爲婕妤而趙飛燕爲皇后久之澤于長等始愛幸入侍  
禁中設宴飲之會及趙李諸侍中皆引滿舉白又云谷永以  
駁譏趙李合二傳觀之趙李之爲飛燕李平復何疑哉升菴  
弇州皆以小臣趙李爲句殊誤弇州云不應與婕妤遊從亦  
未稽敘傳趙李諸侍中語耳當時婕妤貴盛親屬赫奕入侍  
帝宴出假主威谷永傳云爲趙李復怨敘傳云趙李諸侍中  
皆指其親屬也阮公詩正用敘傳語沈休文賦云弱冠未仕  
締交戚里馳驚王室遨遊許史沈所云許史者正謂樂陵博  
望輩耳豈亦指許后及悼皇妣耶此賦可以互證

陳晦伯正揚亦引谷

永傳及敘傳而不明言其爲飛燕李平又未和阮公所云經過者正指其親屬也

施武子

前從渭南集中得施宿名字但其人筋槩無從而覈爲之惘然及讀都玄敬金齏琳琅周壇山石刻跋云有吉日癸巳四字相傳爲周穆王書刻贊皇縣壇山石上慶歷中趙州守將命工鑿山龕其字州廨之壁宋吳興施宿謂州廨舊石以政和五年取入內府則知武子亦留心金石學者今日讀宋章樵釋石鼓文云施宿參諸家本訂以石鼓籀文真刻壽梓干淮東倉司其辨證訓釋蓋亦詳備予得之賞其奧衍奇博且與漁仲爭衡爲之擊節不置吾郡博物一途自休文叔庠開之唐之姚察徐堅正光庭宋之倪思元之趙孟頫周密皆章章在人耳目今更得二施可入掌故補矣



子按春秋季孫宿諡武子施不應以權奸之諡爲字也葛  
稚川云人生值文宿則文值武宿則武施之命字本此古  
星宿及宿夜之宿原一字兩音今人以宿宿二字別之殊  
誤考通志武子知餘姚縣興廢舉墜加意風教云云則武  
子又文苑中循吏也

西施有施

少伯扁舟五湖爲千古風流談柄乃予讀鴻烈解云湯敗桀  
於歷山與妹喜同舟浮江奔南巢然則扁舟麗人少伯已落  
第二著矣予因戲成一詩云湖上桃花豔一枝黃金鑄後杳  
何之君王不比鴟夷子載得西施笑有施按國語云桀伐有  
施有施氏以妹喜女焉左傳云劉累學擾龍事孔甲夏后嘉

之賜氏曰御龍范氏其後也妹喜施姓而范之先亦以夏得  
氏古今事之巧合若此蘇子曰南面之君雖清遠閑放如鶴  
者猶不得好好之則亡其國而山林遁世之士雖荒惑敗亂  
如酒者猶不能爲害而况於鶴乎此有施西施二事斷案也  
董子曰癸有喜辛有妲其象爲同人桀妹喜同乎水者也紂  
二女同乎火者也禹水行乘舟泥行乘橈塗山之娶僅四日  
而往濬川舟一也一爲興符一爲亡資聖狂之相越豈不遠  
哉噫若黃奴者早辦此同舟之策可無入景陽井矣

妹喜漢書作末

嬉

### 華陽國志

常道將華陽國志精嚴簡覈可方陳庶子書乃志蜀猶有軼

事按史記秦本紀厲其公二年蜀人來賂出子十三年伐蜀  
取南鄭志都不載又楚世家肅王四年蜀伐楚取茲方正義  
曰荊州松滋古鳩茲地卽楚茲方是也今志中僅曰巴楚相  
攻伐而已亦不言取茲方此三則皆關蜀大事常侍軼之何  
耶信乎述作之難該也

吹景集卷十二

董斯張遐周著

烏程

韓昌箕仲弓訂

箋屠門高琴引

琴引者秦屠門高所作也秦王縱酒離宮高見宮女幼眇  
寵麗援琴作歌歌曰酒坐俱勿往聽吾琴之所言長袞似  
舞兮乃褕袂何曼奏章而卻逢兮顧瞻心之所驩借連娟  
之寒態兮假卮酒酌五般泣喻而妖兮納其聲聲麗顏歌  
長榆兮歎曰騎美人綺旒紛媵柅霜羅衣兮羽旄夜褒圭  
玉珠參差妙麗兮被雲髻登高臺兮望青埃常羊啖還何  
厭兮歸來歌奧棘多不能句者余淫思十許日始得其緒

爲之句投且箋之冀印可于大方之家

酒坐俱勿往

句

聽吾琴之所言

箋曰酒坐二語爲平原吳趨行明遠東武吟之祖琴之所言琴心也

長袞似舞兮乃褕袂何曼

箋曰袞古袖字長袞善舞曰似舞何也舞節妙會窈窕疑神觀者曰是耶非耶神女賦恍若有來而不見吳都賦仿佛神動迴翔疏峙注仿佛見不審謔也方言云褕謂之袖褕袂似複當作褕音遙一音俞一音偷一音投一音由莊子漁父云被髮揄袂注謂垂手衣內而行也貨殖傳擗鳴

琴揄長袂七發揄流波注揄引也引義爲長列子娥媞靡



曼注曼柔弱也楚辭曼鬢曼睨注曼澤也一云曼延也長也見漢書禮樂志及韓詩薛君章句又莊子馬蹄篇澶漫爲樂崔本作但曼注云但曼淫衍也又闡扼驚曼釋文云驚曼旁出也何云者不圖爲舞之至于斯也曼叶謾

奏章而卻逢兮顧瞻心之所驩

箋曰奏章言舞節之斐然乍陰乍陽若往若還曰卻逢顧迴盼也

借連娟之寒態兮

箋曰漢武帝賦美連娟以修嫵孟康曰連娟纖弱也一作聯娟相如賦修眉連娟索隱曰連娟眉曲細也寒者掩抑態猶俗云澀也西京賦似不任乎羅綺沈約賦含羞隱媚

又云響羅幃而不進隱明鏡而未前白苧歌短歌流目未  
肯前態無定摹故曰借寒字借字非先秦不能寫出  
假卮酒酌五般

箋曰般古盤通五般當是舞曲漢有七盤舞云折盤舞貌  
古新成安樂宮辭般鼓鐘聲盡爲鏗鏘傅武仲賦簡情跳  
跄般紛拏張平子賦歷七般而屣躡音斯賞賞斯醉醉斯  
假矣

泣喻而妖兮納其聲

句

聲麗顏

箋曰泣喻而妖語奇妙夷光捧心孫壽齟齒尤楚楚傾人  
戚夫人倚瑟而絃歌畢每流連泣下樊通德擁髻淒然江  
總詩翠眉未畫自生愁玉臉含嗔還似笑兩心相喻色授

魂子豔冶之尤也茹而不吐曰納玉色當歌緣聲增豔是  
曰聲麗顏

歌長榆兮

箋曰洪适堯廟碑隸釋云榆與榻同張考法苑珠林云夜  
暖晚遲香銷燭榆又云供養三尊牀榆廚膳又云遠離廣  
大牀處在小榆庾闡遊仙詩玉房石榆磊砢洪說蓋有所  
祖也長榆未詳意借翁字翁之爲言未散也庾子山詩但  
令聞一曲餘聲三日飛昔有傳繞梁者翁義歟按列子云  
反兩榆魚而笑注榆他臘反作鰈比目魚也又劉向說苑  
云鄂君子皙乃榆修袂行而擁之舉繡被而覆之以比目  
魚爲榆義殊精異說苑榆字或作揄

歎曰騎美人句綺旒紛

箋曰歎亦騷之亂也騎從去聲騎美人猶言馬上美人也  
張說詩佳人蹀駿馬杜甫麗人行當軒下馬入錦茵此狀  
舞人翩幡如馬上也綺旒一作猗猗用修云卽猗儺字楚  
辭紛旖旒乎都房注言被服盛飾也相如楊雄傳俱有之  
注猶阿那也服虔曰從風柔弱貌此狀舞袖下垂也紛不  
理也

嬋榭霜羅衣兮羽旒

箋曰嬋未詳榭古楫通相如賦翕呷萃蔡注衣張起也循  
聲求之翕呷義似可借劉熙釋名云榭泄也發泄出之也  
然則嬋榭者猶聚散歟荀子云接人則用榭注榭牽引之

也如以楫櫂進舟船也然則媿榭者猶牽引歟縞衣霜如羽如旄云者喻舞衣之懸曳也

夜褒圭玉珠參差句妙麗兮被雲髻

箋曰褒博裾也珠玉參差周穆之玉衣吳都之珠服也王孫子云衛靈公宮人隋珠照日羅衣從風秦其聞衛風而起者歟珠入夜不冥故曰夜褒舞賦華袿飛髻注髻燕尾也

登高臺兮望青埃句常羊啖

箋曰淮南子青泉之埃常羊見西漢禮樂志注猶逍遙也楚辭之尙羊相佯彷徨吳王傳之方佯李夫人賦之幼眇相羊同訓師古注相羊猶翱翔也廣雅曰徇佯戲蕩也飛



燕揚袖曰仙乎仙乎去故而就新常羊之證也啖當作睽  
音閃說文睽睽暫視貌唐小說載術士相裴夫人目修而  
緩法注用修云修湯勞切睽也楚詞嫉光眇視目曾波淮  
南子籠蒙目視冶由笑目流眇所謂睽也三都賦注云睽  
睽音閃釋顧視貌也或曰啖古作啗一作噉如陸賈傳啗  
以利及簡文噉名客之啖猶云餌也

還何厭兮歸來

箋曰歸來者招之之詞漢成帝呼無方爲我持后后曰帝  
恩我使我仙去不得還何厭兮歸來狀舞者若翔而欲去  
若招而復還也

張

按此引只數行而形模姝麗鏤畫若神讀之真令人蕩

魂豔目後世相如子雲之流湛精雕詞不踰其範先秦人  
頰上益三毛手也或曰子以後世語詁先秦無議其後者  
乎應之曰鄭氏解經多參漢律邇無徵則遠無譯也持詁  
六經可也況秦哉余又隳括其語爲一章歌意極了可無  
箋也酒坐俱聽琴言長衰似舞掄何曼奏章卻逢顧所驩  
泣喻而妖聲麗顏連娟寒態酌五般騎美人綺旒紛霜羅  
衣珠參差妙哉麗雲髻被登高臺兮望青埃常羊睽兮還  
歸來

晉陌上桑曲亦隳括楚辭九歌余擬之爲此

世所傳韓詩汲冢國策諸書非全書

湘山野錄云夏英公鎮襄陽遇赦賜致仕高年束帛時胡旦  
瞽廢在襄公選縑十匹贈之胡得縑以手捫之曰寄語舍人

何寡聞如此奉還五匹請檢韓詩外傳及服虔賈誼諸儒所  
解束帛自可見證英公檢之果見三代束帛束修之制十挺  
之脯實一束也束帛則卷其帛為二端五匹遂見十端夏少

沮按服虔通俗文久不傳今類書中少有存者予閱周易注

疏及韓詩新書俱無此解容齋隨筆亦載此條以文瑩多誕不可信閱康侯云又修文

御覽引周書美男破產美女破舌見國策注藝文類聚引周書程

寤曰文王在翟大妣夢南庭生棘小子發取周庭之梓樹樹

之於闕閒化松柏棫柞驚以告文王文王召發於明堂拜吉

夢受商大命秋朝士又引周書曰成王時白州獻比閭比閭

者其葉若羽伐其木以為車終日行又曰於越獻舟又曰藪

澤已竭即蓮掘藕又曰神農之時天雨粟神農耕而種之作

陶冶斤斧爲耜鉏以墾草莽然後五穀興以助果蓏實又曰  
智與眾同非人師也初學記引周書云長勝短輕勝重曲勝  
直強勝弱飽勝飢肅勝恕先勝徐武之經也又曰黃帝始烹  
穀爲粥又曰凡禾麥居東方黍居南方稻居中央粟居西方  
菽居北方列子云火浣之布浣之必投于火布則火色垢則  
布色出火而振之皓然疑乎雪張湛注曰此周書所云博物  
志云西域獻火浣布昆吾氏獻切玉刀刀切玉如蠟茂先亦  
引周書又史記白魚赤鳥事索隱曰見周書後漢書注周書  
陰符曰四輔不存若濟河無舟矣說文引周書曰圍圍升雲  
半有半無李善文選思立賦注引古文周書曰穆王田有黑  
鳥若鳩翩飛而跼於衡御者斃之以策馬佚不克之蹟於乘

傷帝左股又引周書曰周穆王姜后晝寢而孕越姬嬖竊而  
育之斃以玄鳥二七塗以彘血寘諸姜后遽以告王王恐發  
書而占之曰蜉蝣之羽飛集于戶鴻之戾止弟弗克理重靈  
降誅尙復其所問左史氏史豹曰蟲飛集戶是曰失所惟彼  
小人弗克以育君子史良曰是謂關親將留其身歸于母氏  
而後獲寧冊而藏之厥休將振王與令尹冊而藏之於櫝居  
三月越姬死七日而復言其情曰先君怒子甚曰爾夷隸也  
胡竊君之子不歸母氏將寘而大戮及王子於治今汲冢書  
皆未之見戰國策姚寬序云正文遺逸引戰國策者司馬貞  
索隱五事廣韻七事玉篇一事太平御覽二事元和姓纂一  
事春秋後語二事後漢地理志一事後漢第八贊一事藝文



類聚一事北堂書鈔一事徐廣注史記一事張守節正義一

事舊戰國策一事李善注文選一事皆今本所無也又五柳

詠荆軻詩云漸離擊悲筑宋意唱高聲本淮南語古文苑載宋玉笛賦

云宋意送荆卿易水之上張按荆卿與宋玉非同時文苑所載當亦六朝文士假託與李陵書同一贗鼎然其傳亦已古

矣水經注亦云宋如意和之今燕策無宋意事焦弱侯引韓

詩外傳老僮為萑老蒲為葦及精氣歸於天肉歸於土二則

按弱侯據佛典所引今精氣云云載御覽焦云膈歸於露毛歸於草御覽膈作膏毛作髮御覽似勝張按文選

李善注引韓詩外傳云孔子升泰山觀易姓而王可得而數

者七十餘人不得而數者萬數也又鄭交甫將南適楚尊彼

漢皋臺下乃遇二女佩兩珠大如荆雞之卵藝文類聚引韓

詩外傳曰凡草木花多五出雪花獨六出者陰極之數雪花

曰霽雪雲曰同雲又曰自上而下曰雨雪又曰溱與洧謂鄭國之俗三月上巳於兩水之上招魂續魄拂不祥也今本亦無之韻會引吳越春秋越以甘蜜丸櫛報吳增封之禮今書作甘蜜丸党李善文選注引吳越春秋采葛婦歌曰饑不食四體疲又陳音曰逢蒙傳射於楚琴氏琴氏傳大魏大魏傳楚三侯今書無此語藝文引寶劍事云王取純鉤示之辭燭矍然望之曰沈沈如芙蓉始生於湖觀其文如列星之行觀其光如水之溢塘觀其色渙渙如冰將釋見日之光今趙擘本無此語越絕書有之語小異初學記引吳越春秋云王取豪曹視之辭燭曰非寶劍也今豪曹五色黯然無華已殞其光亡其神此劍不登斬而辱則墮於泥中矣王曰寡人置

劍竹蘆上過而墜之斷金獸之領飲濡其刃以爲利也一云  
辟燭曰是巨闕非寶劍也王曰然巨闕初成之時吾坐於露  
壇之上宮中有四駕白鹿而過者奔車驚今本亦闕藝文又  
引袁公事云越王問范蠡手戰之術范蠡曰臣聞越有處女  
國人稱之願王請問手戰之道於是王乃請女女將北見王  
道逢老人自稱袁公袁公問女聞子善爲劍願得一觀之處  
女曰妾不敢有所隱也唯公所試公卽挽林內之竹以枯槁  
末折墮地女接取其末袁公操其本而刺處女處女應卽入  
之三人因舉杖擊袁公袁公則飛上樹化爲白猿與今本小  
異又曰越王念吳欲復讐愁心苦志中夜抱柱而哭承之以  
嘯羣臣聞之曰君王何愁心之甚也夫復讐謀敵非君王之

憂自臣小之急務也又曰夫差帥諸羣臣出國門祠子胥於江濱諸臣並在夫差乃言曰寡人蒙先王之遺恩爲干乘之主昔不聽相國之言乃用讒佞之辭至今相國遠沒江海自亡以來濛濛惑惑如霧蔽日莫誰與言泣下沾襟哀不自勝左右羣僚莫不悲傷又北堂書鈔引越絕書曰闔廬見子胥敢問船軍之備何如對曰船名大翼小翼突冒樓船橋船今船軍之教比陵軍之法乃可用之大翼者當陵軍之重車小翼者當陵軍之輕車突冒者當陵軍之衝車樓船者當陵軍之行樓車也橋船者當陵軍之輕足驃騎也今本並闕乃知唐宋書今之遺佚者多矣安得悉見全書哉

文之時以韻語出奇者汲冢書管夷吾韓非淮南鶡冠孫  
吳太公兵法史記吳越春秋越絕書劉向說苑諸書不能  
盡載略紀最奇勝者一二如左如老子太玄經焦贛易林  
黃石素書參同全以韻成文者不錄

周書允文解略云收武釋賄無遷厥里官校屬職因其百吏  
孤寡無告獲厚咸喜咸問外戚書其所在又云死思復生生  
思復所人知不棄愛守正戶執彼玉珪以居其宇民之望兵  
若待父母是故天下一旦而定有四小明武解云上困下騰  
戒遷其野敦行王法濟用金鼓按道攻巷無襲門戶上下禱  
祀靡神不下具行衝梯振以長旗懷戚思終左右憤勇周祝  
解略云

此解語語奇勝  
讀者當觀其全

文之美而以身剝自謂智也者故不



足角之美殺其牛榮華之言後有茅石有玉而傷其山萬民之患在口言時之行也勤以徙不知道者福爲禍時之從也勤以行不知道者以福亡故曰肥豕必烹甘泉必竭直木必伐又曰木之伐也而木爲斧賊難而起自近者二人同術誰昭誰暝二虎同穴誰死誰生吳越春秋漁父曰今日凶凶兩賊相逢范蠡曰峻高者隕茂葉者摧日中則移月滿則虧四時不並盛五行不俱馳陰陽更唱氣有盛衰公孫聖曰梧桐心空不爲用器但爲盲僮種蠡曰吳殺忠臣伍子胥今不伐吳人何須越絕書計倪曰應變爲動隨物常羊卒然有師彼日以弱我日以彊又曰惠種生聖癡種生狂桂實生桂桐實生桐先生者未必能知後生者未必不能明范蠡曰黃帝之

元執辰破已帝王之氣見其地戶子貢曰薦一賢得及身任  
一賢得顯名又曰道者先生萬物不知老曲成天地不名巧  
說苑云百方之事萬變鋒出或欲持虛或欲持實或好浮遊  
或好誠必或行安舒或爲飄疾從此觀之天下不可一又曰  
貞良而亡先人餘殃猖蹙而活先人餘烈又曰以財爲草以  
身爲寶慈仁少小恭敬耆老犬吠不驚命曰金城常避危殆  
命曰不悔富必念貧壯必念老年雖幼少慮之不早又曰一  
浮一沒交情乃出又曰中不方名不章外不園禍之門直而  
不能枉不可與大任方而不能圓不可與長存慎之於身無  
曰云云又曰一言而適可以卻敵一言而得可以保國韓詩  
外傳云范蠡行遊與齊屠地居奄忽龍變仁義沈浮湯湯慨

慨天地同憂史記李斯傳云時乎時乎閒不及謀羸糧躍馬  
惟恐後時又從外制中謂之惑從下制上謂之賊故秋霜降  
者草花落水振動者萬物作又龜策傳純用韻語當全讀之  
鶡冠子云按圖正端以至無極兩治四致閒以止息歸時離  
氣以成萬業又云一目之羅不可以得雀籠中之鳥空窺不  
出又云至博不給知時何羞不肖擊俗賢爭於時細故裂蒯  
奚足以疑事成欲得又奚足夸干言萬說卒賞謂何

吹景集卷十三

董斯張遐周著

烏程

韓昌箕仲弓訂

而合疏董彥遠除正字謝啟

閔康侯吾僚壻宗伯曾孫中丞弟也雅節嗜古擅淹通之  
聲其所著歐餘漫錄爲澹園眉公所印可近復有梅聽錄  
一書綸巾辨出晦伯元瑞意外升菴復生當首肯康侯矣  
吾家彥遠正字啟卽困學翁不能詳其所出康侯以數年  
排纘力探微剖曠語語分疏之纍瓦編所云未盡解者一  
旦抉其藏而發其滯伯厚有知不曠世稱大快哉康侯自  
云得十之八余復得爲卷爲端一義又康侯疏其事而未

闡其意效李善注文選法也余復求彥遠意疏之并質康侯吾兩人得十之九且留其一以待來者彥遠啟載困學紀聞康侯注已行世茲并錄僕之所疏者如左

彥遠啟曰殘經不悟于郭亡闕文徒存于夏有馬不足一者既失其全虎多于六者自乖其數書殘武殪頌亂湯齊烏寫混淆魚魯雜揉增河南之邑爲雒滅漢東之國爲隋避上則辜不從辛絕下則對因去口棗合而棘氏微足省而疎姓絕定文于六穗之禾訓同于稊分序于八寸之策執異爲宗丁尾亂眞鉤須失實書立書肖而既謬國名爲卷爲端而遂乖服制篆形誤僞誰正雲興之祁祁隸體散亡共守鸞聳之鉞鉞鎖定銀鑄之名車改金根之目知一



束三縫之爲來指二首六身之爲亥郡章立信救時惟正  
于四羊國史傳疑考義共惑于三豕傳會作九禾之秀離  
析爲三刀之州合樂之奏妄加文武之爲斌定經之名誤  
合日月之爲易字失部居改白水真人之兆書忘形象作  
非衣小兒之謠四十八安取于乘三十七未足語世梁父  
七十二家名雖俱在尉律四十九類書蓋已亡誤存舟二  
閒之爲航安識門五日之爲閏  
殘經不悟于郭亡闕文徒存于夏有

康侯疏曰春秋莊二十四年郭公杜注經闕誤也公穀以  
上文赤歸於曹連郭公讀謂郭公失地之君赤其名左傳  
成二年衛侯使孫良夫石稷將侵齊與齊師遇石子欲還

孫子曰不如戰也夏有注闕文失新築戰事余向輯三傳  
備錄此條一時失憶得仲姪生甫語恍然

遐周疏曰莊二十四年郭公胡文定曰此郭公也先儒或  
以爲郭亡郭亡之說本新序齊桓公出遊於野見亡國之  
墟問於野人曰是爲何墟野人曰是爲郭氏之墟桓公曰  
郭氏者曷爲墟野人曰郭氏者善善而惡惡桓公曰善善  
而惡惡人之善行也其所以爲墟者何也野人曰善善而  
不能行惡惡而不能去是以爲墟也

馬不足一者旣失其全

康侯疏曰史記石建爲太僕奏事下讀之驚恐曰書馬者  
與尾而五今乃四譴死矣

虎多于六者自乖其數

康侯疏曰顏氏家訓後漢書酷吏樊攄為天水郡守涼州為之歌曰寧見乳虎穴不入犇城寺而江南書本穴皆誤作六夫虎豹穴居事之較者所以班超云不探虎穴安得虎子寧當論其六七乎

書殘武殪

康侯疏曰左傳宣六年引康誥曰殪戎殷殪卽壹衣卽殷也中庸壹戎衣而有天下注衣讀如殷齊人言殷聲如衣

衢按壹戎衣武城文啟指為殘似據康誥郭忠恕佩觿集云近煙為殪注

禮壹戎衣鄭云壹當為殪

頌亂湯齊

康侯疏曰長發至于湯齊傳齊如字禮記閒居注音躋正義言三家詩有讀爲躋者下文聖敬日躋閒居躋作齊音齋故曰亂

烏寫混淆

康侯疏曰海錄碎事古語云字經三寫烏焉成馬又野客叢書序云轉烏爲焉則本文寫字似有誤遐周疏曰寫當作馬

魚魯雜揉

康侯疏曰張鷟云魯之與魚淄澠莫辨抱朴子云以魚爲魯以帝爲虎

增河南之邑爲雒減漢東之國爲隋

康侯疏曰事文類聚漢以火行忌水故洛字去水而加佳  
隋以周齊不遑寧處故隨字去辵而從隋遐周疏曰洛改  
雒見魚豢魏略顏師古地理志注左傳漢東之國隨爲大  
楊堅去辵作隋見野客叢書按說文雒鳥名在佳部又馬  
名見詩魯頌有駟有雒皇覽云孔子墓有柞枌雒離女貞  
五味鬻檀之樹鬻齊民要術作  
覺史記注作攬漢古今人表舜友有雒陶  
秦有大雒華陽志蜀廣漢有雒縣山海經肅慎之國有樹  
名雒常聖人代立於此取衣光武或據此改之若春秋書  
會戎於雒用修引以證洛之爲雒不始於漢殊誤春秋中  
雒字當亦後人所改太史公載禹貢伊雒瀍澗亦可援以  
證洛之舊爲雒乎隋音爰裂肉也見說文及路史升菴本



之按史記天官書廷藩西有隋星五宋均云南北爲隋隋  
謂垂下也楊堅其或以天星爲國號乎又周禮守祧職云  
旣祭則藏其隋與其服鄭司農云隋謂神前所沃灌器名  
鄭玄謂隋尸所祭肺脊黍稷之屬藏之以依神又大祝職  
隋釁逆牲注隋釁謂薦血也小祝職贊隋贊徹贊奠注隋  
尸之祭也儀禮特牲少牢皆有隋祭之事今文或作綏或作換或作接  
戴記曾子問曰攝主不厭祭不旅不假不綏祭注綏本作  
隋釋文隋許規反又許恚反毛詩破斧箋云隋釜曰斧隋  
徒禾反又湯果反注隋狹長也又戴記禮器注云禁如今  
方案隋長局釋文隋他果反廣雅媿媿娃隋好也懷就息  
隋歸也俱大果切乃國語晉辛俞云隋其前言又借作墮

字用矣土虞禮墮祭之墮注引周禮藏其墮爲證衛風桑之落矣其黃而隕毛傳隕隋也公羊注邲之戰指隋舟中漢鄘閣頌亦云遭遇隕納人物俱隋又方言隋旣易也謂解旣也音他臥反則隋墮義本相通矣然則隋有六音曰隨曰綏曰隕曰陀曰妥曰墜亦有六義曰裂曰墮曰垂下曰狹長曰好曰歸

張按水經注廣漢雒縣之雒亦作洛外域記曰交趾有雒田隨潮上下升菴引此雒作駱音架又水經注隨皆作隋字引隋侯之珠以爲卽春秋之隨國鹽鐵論云吳越之竹隋唐之材不可勝用沈約宋書云西隋縣漢屬牂牁晉屬興古字並作隨然則隨隋本可互用也

避上則鼻不從辛

康侯疏曰說文鼻字從辛從自鼻人蹙鼻辛苦之狀秦以鼻字似皇字改爲罪

絕下則對因去口

康侯疏曰山堂考索古對字本從口漢文帝去口從土

遐周疏曰說文云漢文帝以口多非實改從土王勉夫云

觀大夫始鼎銘則對字從土者舊矣彥遠豈未見鼎銘耶

按始鼎銘曰大夫始對揚天子休用作文考寶鼎見廣川書跋彥遠此書當在作版後也

棗合而棘氏微足省而踈姓絕

康侯疏曰晉書棗據本姓棘其先避仇改焉王莽末踈廣

曾孫孟達避難自東海徙居沙鹿山南因去踈之足遂改

姓東又考路史云盧雷陳甄既云聲轉仇求棗棘則謂仇改豈惟不學之過亦不識字所致東方生曰來來爲棗棗陽本棘陽是知棘祇棘據之改爲棗非避仇也

升菴有棗棘象形說

又按漢書廣姓从充非東也

遇周疏曰充古荒字見陸德明易釋文楊子雲集又廣雅云兄充沛大也疏說文作𠄎从爻疋或作𠄎或作疏無从東者詩韻輯略踈字下云通作疏

定文于六穗之禾訓同于導

康侯疏曰顏氏家訓封禪書導一莖六穗於庖犧雙觥共抵之獸此導訓擇光武詔云非徒有豫養導擇之勞是也說文云導是禾名引封禪書爲證自當有禾名導非相如

所用禾一莖六穗於庖豈成文乎縱強爲此語則下句當云麟雙解其抵之獸不得云犧也衢按史記載此書道下從禾漢書文選俱从寸說文據史記所從解禾名不知漢書注自解擇也若李本寧以董啟從小查字書無導字恐傳寫之誤

張按導作導古八分書有此法見後魏弔比干文

遐周疏曰焦弱侯以導爲導從之官如今儀仗司誤嬾真子云前漢百官表少府屬有導官掌米穀以奉至尊然學者多疑導字之義僕考唐百官志導官令掌導擇米麥凡九穀皆隨精麤考其損耗而供然漢導字下從寸唐導字下從禾今按韻略瑞禾一莖六穗謂之導恐唐以瑞禾名官也僕嘗以此問舅氏張君笑云蓋讀司馬長卿封禪書





誤耳書云導一莖六穗於庖注云導擇也一莖六穗謂嘉禾之米也後人誤以瑞禾爲導遂併官名失之可一笑也張按馬永卿此論可與顏氏相發明者故錄之

分序于八寸之策執異爲宗

康侯疏曰北史鄭玄論語序云書以八寸策誤作八十宗徐遵明曲爲之說

遐周疏曰此玉海所引文也按北史儒林傳徐遵明字子判好聚斂聚徒教授懸納絲粟留衣物以待之名曰影質有損儒者之風見鄭玄論語序云云因曲爲之說其僻也如此

丁尾亂眞

遐周疏曰莊子曰丁子有尾李頤注夫萬物無形形無定  
稱在上爲首在下爲尾世人謂右行曲波曰尾今丁子二  
字雖左行曲波亦是尾也按說文丁字作是無尾也故  
曰亂真澹園駁姜平子不曲之說失之矣說文丁作下  
作丁丁字本直而不曲又按王勉夫云不識一丁乃个字  
非丁字蓋个與丁相似傳寫誤耳用修元美俱引此事元  
美復有論辨不甚快人意不證說文豈知字學之原耶  
丁子有尾上下文俱言事理所必無者卽烏頭白馬  
生角之類而詰者妄以左行曲波爲尾誤人千古

鈎須失實

康侯疏曰荀子不苟篇鈎有須注卽丁子有尾也丁之曲  
者爲鈎須與尾皆尾類是同也

遐周疏曰按說文鉤曲也鉤作鎮丁之曲者爲鉤今鉤曲而丁直故曰失實

書立書肖而旣謬國名

康侯疏曰劉向戰國策序本字多誤脫爲半字以趙爲肖以齊爲立困學又誤以立爲六

爲卷爲端而遂乖服制

遐周疏曰禮玉藻龍卷以祭玄端而朝日於東門之外聽朔於南門之外鄭注云卷或作袞字之誤也正義云禮記本或作卷字其正經司服及覲禮皆作袞字故鄭注王制云卷俗讀其通則曰袞是也知端當爲冕者案下諸侯皮弁聽朔朝服視朝是視朝之服卑於聽朔今天子皮弁視

朝若玄端聽朔則是聽朔之服卑於視朝與諸侯不類且聽朔大視朝小故知端當爲冕也

篆形誤僞誰正雲興之祁祁

康侯疏曰顏氏家訓詩云有滄萋萋興雲祁祁毛傳云滄陰雲貌萋萋雲行貌祁祁徐貌案滄已是陰雲何勞復云興雲祁祁耶雲當爲兩俗寫誤耳又升菴外集漢無極山碑興雲祁祁雨我公田王介甫有雲之祁祁詩

遐周疏曰呂氏春秋引有晦淒淒興雲祁祁較今詩晦字淒字雲字異韓詩外傳同

隸體散亡其守鸞聲之鉞鉞

康侯疏曰說文鉞車鑿聲從金戈聲呼會切詩曰鑿聲鉞

鉞俗作鐵以鉞作斧戍之戍非是衢按今庭燎作噦噦

鎖定銀鑄之名

康侯疏曰顏氏家訓後漢書囚司徒崔烈以銀鑄鑲銀鑄  
大鑲也世誤作金銀字武烈太子嘗作詩云銀鎖三公腳  
刀撞僕射頭

車改金根之目

康侯疏曰事文類聚退之子昶性闇劣爲集賢校理史傳  
有金根車悉改根字作銀字

知一束二縫之爲來

康侯疏曰說文來周所受瑞麥來麩一束二縫象芒束之  
形天所來也故爲行來之來



指二首六身之爲亥

康侯疏曰左傳晉悼夫人食輿人之城杞者絳縣人或年  
長矣有與疑年使之年曰臣生之歲正月甲子朔四百有  
四十五甲子矣其季於今三之一也吏走問諸朝師曠曰  
七十三年矣史趙曰亥有二首六身下二如身是其日數  
也士文伯曰然則二萬六千六百有六旬也

郡章立信救時惟正于四羊

康侯疏曰東觀記馬援上書城臯令印臯字白下羊丞印  
四下羊尉印白下人人下羊卽一縣長吏印文不同恐天  
下不正者多符印所以爲信也所宜齊同事下大司空正

郡國印章

張按郭忠恕引此云成臯令臯字爲自  
下羊丞印四下羊上刀反非羊也

國史傳疑考義共惑于三豕

康侯疏曰家語卜商反衛見讀史志者云晉師伐秦三豕

渡河子夏曰非也已亥耳問諸晉史果曰己亥

傳會作九禾之秀離析為三刀之州

康侯疏曰事文類聚光武生濟陽縣舍是歲縣界有嘉禾

生一莖九穗因名曰秀晉王濬為廣漢太守夜夢三刀懸

于臥室梁上須臾又夢一刀主簿李毅曰三刀為州字文

益一刀者明府其臨益州乎果然

唐元翰林寄辭校書詩個個公侯欲夢刀

遐周疏曰按說文秀字作秀從禾從乃不從九也州字作

州從川不從刀也故曰傳會曰離析

合樂之奏妄加文武之為斌

康侯疏曰文獻通考魏太和初公卿奏歌以詠德舞以象  
事于文文武爲斌謹製樂舞名章斌之舞

遐周疏曰說文本作彬文質備也從文配武過爲鄙淺故  
曰妄加

定經之名誤合日月之爲易

康侯疏曰易蜥易蠲蜓守宮也象形從勿祕書說日月爲  
易象陰陽也徐曰謂下爲月字也見說文及韻補

遐周疏曰按餘冬序錄吾子行謂說文引蒼頡易字象蜥  
蜴形蜥蜴善變則知古人託之以喻其變不疑也虞翻云  
日月爲易子行不從其說吾衍此論彥遠先之

字失部居改白水真人之兆

康侯疏曰後漢書王莽篡位忌惡劉氏以錢文有金刀故  
改爲貨泉或以貨泉字文爲白水真人

遐周疏曰說文泉字作泉象水流出成川形不從白亦不  
從水也故曰字失部居

書忘形象作非衣小兒之謠

康侯疏曰朝野僉載裴炎爲中書令時徐敬業欲反令駱  
賓王畫計取炎同起事賓王足蹋壁靜思食頃乃爲謠曰  
一片火兩片火緋衣小兒當殿坐教炎莊上小兒誦之并  
都下童子皆唱炎遂與合謀內應又唐書張權輿欲傾裴  
度作僞謠云非衣小兒坦其腹天上有口被驅逐據啟用  
單非字似正張謠但以儷白不類惟加糸傍始失裴字形

象對又較精刻本疑誤升庵載張謐从緋固謬若困學雖知謠爲炎起而不知二謠有緋非

之別也

### 四十八安取于桑

康侯疏曰事文類聚蜀何祗夢井中生桑以問占夢趙直直曰桑非井中之物會當移植然桑字四十下八壽恐不遇此祗後至健爲太守四十八果卒  
遐周疏曰何祗事見益部耆舊傳俗桑字从四十八按說文从叒从木不从十从八也故曰安取于桑

### 三十七未足語世

康侯疏曰史記秦會稽碑俱四字句獨三十有七年多一字元申屠駟家藏舊刻世有七年三十爲世速達反退之



自謂識字故孔戣志銘亦云孔世世八世字世字俗俱作世見金薤琳琅餘冬序錄及韻端未知與啟合不

遐周疏曰說文世字作𠄎从舟三十井也音撒三十年爲一世七字作𠄎从一世旁作𠄎似七字乃从舟而曳長之  
不从七也故曰未足語世

梁父七十二家名雖俱在

康侯疏曰漢書郊祀志齊桓公欲封禪管仲曰古者封泰山禪梁父者七十二家而夷吾所記者十有二焉又玉海仲尼見泰山封禪者七十有二家文皆不同

遐周疏曰桓譚新論泰山之上  
有八百餘處而可識知者  
七十有二

尉律四十九類書蓋已亡

康侯疏曰尉律見說文敘及江式論書表王伯厚云藝文志謂漢興蕭何草律著其法曰太史試學童以六體試之律卽尉律也

遐周疏曰按漢元始中召天下通小學者以百數各令記字於庭中楊雄取其有用者作訓纂篇凡八十九章四十九疑作八十九未知是不

誤存舟二閒之爲航

康侯疏曰顏氏家訓亘從二閒舟詩云亘之柁桹是也今之隸書轉舟爲日何法盛中興書乃以舟在二閒爲舟航

字謬

遐周疏曰說文區从二从囧恒从心从冫在二之間上下  
心以自施恒也恒古作恒顏黃門語本此今大雅作恒之  
拒秘毛萇傳云恒徧也孔穎達云以言種之廣多故以恒  
為徧恒之為亘亦當時傳寫之錯衛按鄭箋恒古鄧反本  
又作亘正義亦言定本

作恒集注  
皆作亘字

安識門五日之為閏

康侯疏曰左傳晉伐鄭十二月癸亥門其三門閏月戊寅  
濟於陰阪杜注此年無閏月戊寅是十二月二十日疑閏  
為門字閏內王為五字月為日字晉攻鄭門門各五日自  
癸亥至戊寅凡十五日也

彥遠名道廣川人上世多著名蹟當宣和時道君好古

從遊祕殿又知識之家示以所藏鑒別批駁著書畫跋  
若干卷嘗謂黃長睿異書不可不看道初除正字供職  
未幾乃以平日所疑事閱傳記決疑者多自此後論議  
覺進信知書不負人也夏日蔡居安會館職於道山食  
瓜令徵瓜事彥遠連徵悉有依據聞所未聞坐客歎伏  
觀此所稱博物君子非歟宋史文苑不爲立傳他文亦  
少流通使困學翁不載此啟此妙語如慶喜見阿闍佛  
國一見不再見然使吾兩人不參互考究誰知其語之  
所從者吾兩人用心亦良苦矣復取昨疏稍加竄定蓋  
以答夫紹廣川家學者合疏之意云天啟甲子四月只

陳眉公答康侯閒

前讀吾丈與遐周合疏董啟眞國朝第一奇博卽起用  
修元美兩先生而問之愕不知置對弟如蹇衛豈能追  
穆王之駿列子之風乎已矣不敢復敘矣當刻之稗官  
家傳示海內使寒膚慊腹者見之知江東有如此兩異  
人耳

附疏洪周啟語

因學紀聞云洪景廬周茂振入館謝啟雖不若彥遠之  
博如桃菜難悟柳卯本同幼婦外孫之義女郎世子之  
名亦儷語之工者康侯疏曰後漢書馮衍傳衍遺田邑  
書曰內無鉤頸之禍外無桃菜之利章懷太子注云案



左傳謝息得桃邑萊山故言無桃萊之利也且爲萊字似棗文又連桃後學者以桃棗易明桃萊難悟不究始終輒改萊爲棗展轉乖僻爲謬矣啟正用注成句傳寫復誤以萊爲菜○吳志注虞翻別傳翻奏鄭玄解尙書違失事目古大篆卯字讀當爲柳古柳卯同字而以爲昧學齋佔畢云尙書堯典分命和仲宅西曰昧谷以爲羲仲宅暘谷之對其義坦然明白而周禮縫人衣裘柳之材鄭注引書曰柳穀然考漢隸古定古文尙書眡谷眡乃昧字史記堯本紀昧谷徐廣注一作柳谷是鄭原以昧爲柳而徐因之虞何以云爾○世說新語魏武嘗過曹娥碑下楊修從碑背上見題作黃絹幼婦外孫擘

曰八字魏武謂修曰解否答曰解魏武曰卿未可言待  
我思之行三十里魏武乃曰吾已得令修別記所知修  
曰黃絹色絲也於字爲絕幼婦少女也於字爲妙外孫  
女子也於字爲好鰲曰受辛也於字爲辭所謂絕妙好  
辭也魏武亦記之與修同乃歎曰我才不及卿乃覺三  
十里孝標注謂碑在會稽魏武楊修未嘗過江而青瑣  
集猶有曹與劉孫微時嘗會京口之說○南史賈希鏡  
傳家傳譜學宋孝武時青州人發古冢銘云青州世子  
東海女郎帝問學士鮑照徐爰蘇寶生並不能悉希鏡  
對曰此是司馬越女嫁荀晞兒檢訪果然由是見遇按  
晞爲青州越爲東海王二人並顯懷愍聞

湖廣青洲縣為東新王二人並獲對標

謹曰出長同訊城文致醫新良然苗果然由長良醫

康寧之相濟問學士照照令受慈賢正並不指悉余

勸樂勸讀學與老究知音州人疑古案證云青陝廿十

泉際育曹與隆歷歷對會東口之端○南史賈亦餘

十里等點封國縣齊會節縣知縣謝未嘗議而青

翰出縣知縣出之與會國代煥曰非本不又與代費三

文于出代率與漢望曰受辛出外字然翰也節縣城

曰黃龍山絲山文字為強也心之出外字為越也

知思之行三十里縣知曰吾曰與令對風清恨候

吹景集卷十三終

曰與否谷曰織機瓦曰與未可言

吹景集卷十四

士五世多相破備樂元帝

烏程

董斯張遐周著

則太戰五平雙林寺

韓昌箕仲弓訂

補書記洞詮九則

宣城梅禹金輯洞詮一書網羅千載雙引華梵獨遺傳大

士及梁隋諸帝書余就雙林傳錄閱之得大士奉梁武帝

大書二狀一武帝詔一答狀一釋菩提等書一隋文帝書二

煬帝書一

大同元年九月二日大士遣傅暄奉書於帝曰雙林樹下當

來解脫善慧大士白國主救世菩薩今有如意寶珠清淨解

脫照徹十方光色微妙難可思議欲施人主若能受者疾至

菩提

洞詮所輯僅中大通六年正月十八日一書耳

帝詔曰若欲見願甚佳也

大同五年大士重入都行至鍾山以狀上帝曰帝豈有心而欲辯大士豈有義而欲論耶帝答曰有心與無心俱入於實相實相離言說無辯亦無論

大同六年大士復至都下止蔣山遣傅暉奉書於帝曰雙林樹下當來解脫善慧大士白國主救世菩薩皇帝性合正道履踐如如大士爲菩提下而故高皇帝爲菩提高而故下機緣感應故成佛事今者故來普勸一切同修正道謹白

陳太建五年雙林寺釋菩提等作書與朝貴曰伏惟亡師大士在世之時頻詣梁武帝弘通正道多逢惱障請朝貴爲護法檀越並蒙弘獎今徒眾弟子奉遵遺教紹繼慈旨輒依先



仰請為護法特願垂許於是自朝廷宰貴以下至於士庶具題曾里願為護法檀越者甚眾按菩提等又啟宣帝請護法帝答書可之今此啟及宣帝書錄中失載

隋開皇十五年二月十五日文帝作書與沙門惠則等曰皇

帝敬問惠則法師如來大慈矜念羣品救度一切為世津梁

朕君臨天下重興法教欲使三寶永崇四生蒙福汝等歸依

正覺宣揚聖道想勤修梵行殊應勞德秋暮已安道體如宜

也今遣使人指宣往意洞詮僅輯仁壽元年正月十五日一書禹金從閣帖中錄出辭亦小異又

闕年

開皇十八年帝又與書曰朕受天命撫育黎元尊崇三寶情

深救護望十方世界一切含靈蒙茲福業俱登仁壽汝等栖

心淨土投志法門普為羣生宣揚聖教又知比來為國行道

勤修功德當甚勞心汝等弘此慈悲精誠苦行廣濟眾品深  
慰朕懷既利益處多勿辭勞也

大業元年煬帝書曰朕欽承寶歷撫育萬方思弘德化覃被  
遐邇况復昔居蕃屏作帝江都所管之內臨踐日久興言惟  
舊有異常情今者巡省風俗爰屆淮海山川非遠瞻望載懷  
薄寒道體清豫廣修淨業實足津梁既以弘濟爲心不爲勞  
也

黃子野

黃子野字仲唐時侯官人也父周行賈於杭州子野年十三  
從之其父就他郡以子野守舍適王伾微時覆舟於羅刹江  
子野行見之奮臂呼曰能生得人者予百金於是漁者得伾

子野卽與以舍中裝直百金其父歸大異之子野曰身得其名乃令父喪贏非孝也遂去爲人僕賃主人微聞救伍事義其爲人陰倍其償乃爲小賈之息久之旣蓄藏以其半爲親甘毳費以其半散貧交昆弟乃折節讀書治左氏春秋無何客有勸之仕者子野不答因自見知於人遂變姓名焚豪素耕於方山其後王伾爲散騎常侍使人召之則亡令福州觀察使處置物色之得之陽岐江上有一男子扁舟披蓑獨臥雪中忽扣舷歌曰蚤潮初上海門開漠漠彤雲雪作堆一百六峰都掩盡不知何處有僧來又歌曰幾日江頭醉不醒滿天風雪臥滄溟定知酒伴無尋處門外松濤坐獨聽使者疑其子野遙呼之曰仲無恙乎子野曰唯唯於是遂達伾之命

隨子野至青山中家徒四壁立几上獨周易一卷子野佯喜  
設脫粟之食與之約旦日雪霽會傳舍旦日傳舍長展車待  
客夕時子野不至使者馳至則書幣封識如故子野已遁去

矣

此事出閩中徐興公榕陰新檢周  
虞卿近以遺余得此喜甚遂錄之

### 離湖

豫章宗室鬱儀箋水經注胸中具數百卷成書方可辦此真  
地志中第一奇書也第其箋離湖一則不無小恨酈玄云沔  
水又東有離湖在華容縣東七十五里國語所謂楚靈王闕  
爲石郭陂漢以象帝舜者也湖側有章華臺鬱儀云今國語  
中無石郭象舜語張按吳語申胥諫吳王伐齊曰昔楚靈王  
不君其臣箴諫以不入乃築臺於章華之上闕爲石郭陂漢

以象舜韋昭注云闕穿也陂壅也舜葬九嶷其山體水旋其  
正下故壅漢水使旋石郭以象之鬱儀嗜古不減河閒往歲  
所著玄覽直欲使宛委失色此段當一時失檢耳

### 嬰蘭

吳越備史載錢鏐題湖州嬰蘭堂詩初疑郡故有碧瀾堂似  
寫手偶誤及讀古樂府作蠶絲云柔桑感陽風阿那嬰蘭婦  
蓋江南蠶務獨盛吳興唐人或采此名堂耳嬰字殊費解或  
曰嬰具童稚義如左氏之稱季蘭者

### 鳥語

公冶長解鳥語用修引嘖嘖喑喑事以爲未知所出澹園云  
出論語疏張閱邢昺書了無一語及此此出史記注中兩先



生一時輕下筆耳

牛僧孺好石

胡元瑞駁用修云牛僧孺不聞有好石事李德裕有平泉醒酒石恐楊因牛李誤舉之按唐書僧孺留守東都多致嘉石美木與客相娛樂英華有白樂天太湖石記其略云丞相奇章公嗜石游息之時與石爲伍石有族聚太湖爲甲先是公之寮吏多鎮守江湖知公之心惟石是好乃鉤深致遠纍纍而致公又待之如賓友親之如賢哲重之如寶玉愛之如兒孫石有四等以甲乙丙丁品之每品有上中下各刻于石之陰曰牛氏石甲之上丙之中乙之下又鄭虎臣吳都文粹載僧孺題太湖石詩二十韻其略云醜凸隆胡準深凹刻兕觥

雷風疑欲變陰黑訪將行噤瘳微寒早輪困數片橫似逢三  
益友如對十年兄王去聲興添魔力消煩破宿醒媿人當綺皓  
視秩卽公卿夢得樂天俱和之東坡石林亭詩云唐人唯奇  
章好石古莫攀盡令屬牛氏刻鑿紛班班樂天子瞻之文明  
著如此而元瑞云云何其莽也當時牛李俱有石癖奇章石  
獨得香山月旦贊皇於此輸一著矣吾郡陳君潤祖勝國時  
進士也其記采菱渡石云牛李交相訾毀如冰炭昂甲乙戒  
子孫嗜石如出一人嗟乎使二君者以嗜石之心輔世鹽梅  
相濟何至蠻觸紘紘哉

少陵詩

少陵詩鷺鴨宜長數柴荆莫浪開按西京雜記曹元理善算

術嘗從其友人陳廣漢羊豕鷺鴨皆道其數杜借用西京事也又出門復入門雨腳但仍舊雨腳二字本齊民要術種胡麻截斷雨腳語

鸚鵡妃

秦少游有所盼山谷戲以詩云誰饋百牢鸚鵡妃按朱彥時黑兒賦曰忿如鸚鵡鬪樂似鸚鵡喜黃詩祖之夫丹脣皓腕故是佳人本色乃晉惠之南風劉鋹之媚猪都以玄質爭妍狐妖椒掖少游所盼亦異乎碩人之章矣

蘇詩押於字韻

傳伯壽啟我則異於獨仰韓公之斗是以歇後見奇者

康侯

於之爲言于也押韻未有用之應劭風俗通引孔子曰臨大節而不可奪相於之義具于此矣大涅槃獅子吼品云如蛇

鼠狼各各相於常生怨心。金光明經懺悔品云：願諸眾生色貌微妙，各各相於其相，受念蔡中郎書岸幘，廣坐舉杯相於曹子建詩，廣情故心相於古樂府讀曲歌。君行負心事，那得厚相於唐太宗詩，調軫坐相於少陵詩，良友幸相於本。此又史記相如上林賦云：垂條扶於郭璞云：扶於猶扶疏也。庾野詩：舍風搖古度，防露動林於竹。名見戴凱之竹譜。不同前訓退之示兒詩云：東榮饌親賓，冠昏之所於。造語太詭，未可爲後學式。

詩林廣記載韓詩作冠昏所依於

按華嚴清涼鈔云：如來具足六十四音，以聲有八轉。一曰體，二曰業，三曰具，四曰爲，五曰從，六曰屬，七曰於，八曰呼。乃至七補盧鍛，是所於聲如客依主，故云於也。於卽依義。

觀此則韓詩似有所本盜其語又欲火其書乎昌黎何以

置對

玉腰蠟車

高似孫錄常袞虹玉圍腰語以爲奇雋按洛陽伽藍記云貂蟬耀首寶玉鳴腰鳴之一字借堅白意也又名直有裂史黏窗語考謝儼得范曄後漢書本曄敗盡蠟以覆車鳴之與圍黏之與蠟何啻尋尺六朝人用字不肯草草如此

梁簡文七勵云緣腰白玉帶佩黃金緣腰語亦勝又梁謝郁與何敬容書鳴玉在腰伽藍記本此

文人相祖

曹子桓第云文人相輕初不言文人相祖也張平子七辨云



形似削成腰如束素邊文禮章華賦云體近輕鴻榮曜春華  
今學士家但嘖嘖東阿語耳石徂徠擊蛇笏銘云在齊爲太  
史簡在晉爲董史筆樂天冷泉亭呂溫虢州三堂二記都以  
四時寫景物希文狀岳陽文山歌正氣一擷其菁爭光日月  
文之顯晦有數哉然愚謂蘇公學韓白公學杜尤是翻着轆  
手若但以形骸求之魯男柳下有甚干涉

### 察書

漢西嶽華山廟碑書佐新豐郭香察書趙德甫歐陽永叔金  
石錄俱載之二公都不著論辯永叔之子棐謂爲郭香察所  
書極誤洪氏隸釋以郭香爲人名察書者察蒞他人之書耳  
洪說頗近之猶未快張按道安法師撰摩訶鉢羅若波羅蜜

經鈔序云阿難出經去佛未久尊者大迦葉令五百六通迭  
察迭書予以此證察書之說渙然無疑蓋安公東晉閒人去  
漢世不甚遠謝朓三日曲水宴詩云長壽察書龍樓迴轡察  
書之說殆當時常談後來便復茫然紛紛置喙恨不以此語  
都太僕也後漢書律歷志熹平元年有治歷郎中郭香豈卽  
其人耶

博物信是難事

宋景文筆記黃長睿東觀餘論二書證據精審似無遺憾乃  
棗之爲邁移之爲郁李卯非柳字朴有僕音歎篆出碧落碑  
舉石誤劉表事璇題不同題榜甘蔗舊無從竹李衍樓鑰拳  
拳爲二書摘瑕不敢持耳食誤來學真黃宋兩家鼓吹也近

世性用修元美稱博綜最婺州胡元瑞跋扈自雄幾欲與吳蜀鼎立乃汝南有正楊相傳閩亦有正王婺州幸未聞議其後者近閱其書如夷羊在牧僧孺好石二事稍爲正之至雙樹幻鈔一種所錄經藏某經幾千卷某經幾百卷全據西遊記中誕語以侈多聞其間又稱論爲經殊可怪笑試一閱聖教總目元瑞敗闕立見矣元瑞稱用修有二癖至以迂怪滅裂譏之且曰求忠臣於楊氏之門或爲余屈其一指也元瑞豈真謂霸氣未消後來者竟不敢以一矢相加遺耶余胸中存幾卷書輒敢生此狂語年來覺百年一瞬學古無涯實見博物是一難事但願多讀書晚著書向蠹魚場中與諸賢把臂其行便是極樂國土以此自勸并勸同調者

星經劍錄

星經傳漢甘石書其敘須女四星有台州婺州之目與爾雅之零陵長沙何異隱居刀劍錄載唐李章武名又楊玉夫候織女蒼梧慙態也而移之昇明帝隱居嘗以一事不知爲深恥迺居恆目擊者反消訛若斯哉或謂隱居特好說劍真語中所稱尸解蓋劍術也又云但畜神劍與之相隨十三年自能化形好事者因傳會之成劍錄一書云

弟子學文解

除卻孝弟更有何學謹者謹乎此信者信乎此愛人者推乎此親賢者輔乎此皇皇焉日無暇給可謂之有餘力矣乎餘力云者爾室屋漏不動不言離父兄師友之側云爾也自以

爲孝也弟也謹信也親且愛也夫不有大杖則走之爲孝而  
飲此有後之爲弟乎夫不有不言溫樹之非謹而水至踐期  
之非信乎夫不有容貌若愚者之不得爲眾而行違色取者  
之不得爲仁乎此之不可不學也學之者置其身於古聖賢  
之林直見古聖賢若何而言若何而行若何而爲言之根  
柢一息不可對聖賢卽不可對父兄不可對師友學之學之  
矻矻汲汲無罔無殆事親從兄手舞足蹈一身之文也左紛  
右玦昧爽而朝日入而退一家之文也宗族鄉鄰人無閒言  
一鄉之文也惟孝友于是亦爲政一國之文也推而行之東  
海而準推而行之西南北海而準甘露天降醴泉地湧兩閒  
四海之文也舜孔子終其身無時而非弟子者也原壤終其



身無時而爲弟子者也賜之願息求之自畫予之食稻衣錦  
可以爲弟子而不肯爲弟子者也子輿氏乃所願學爲弟子  
者也天下皆弟子則天下皆堯舜天下皆學問文章故曰大  
人者不失其赤子之心

兼弱攻昧解

仲虺之誥曰兼弱攻昧取亂侮亡推亡固存解者多不得其  
說雖坡翁未有論著如蔡傳所云弱者兼之昧者攻之此戰  
國縱橫家言假仁之霸不爲而玄王爲之耶爾雅云南方有  
比翼鳥焉不比不飛其名謂之鸛鸛之爲言兼也兼之猶兼  
容也攻之猶他山之攻也兼之如小白城魯鹿門重耳戰城  
濮解宋圍是也攻之如使人問葛奚爲不祀蔡止之誓無易

樹子無以妾爲妻是也苟其冥昧益堅文告不入兼之不可  
攻之不能鳥獸行謂之亂狎五常謂之侮時日曷喪謂之亡  
斯取之而已矣其不幸而免爰雉懼流離墳尾則推而立之  
其僅存而無援則擁而固之取也者爲未亡必亡者言也推  
也者爲旣亡而可使不亡者言也詰終繼之曰殖有禮覆昏  
暴蓋於是而仲虺之指昭昭矣

詩箋解孫字

豳風公孫碩膚赤舄几几毛傳云公孫成王也赤舄人君之  
盛履也鄭箋云孫遁也言周公遜大美而不居也大雅詒厥  
孫謀以燕翼子鄭箋云孫順也言遺其所以順天下之謀也  
僕謂古多借用然必本字不可強通方豎別義若鄭氏定以

孫爲遜亦何異張騫鑿空然毛萇謂公孫卽成王繆旦非幽  
公孫耶毛据周禮屨人掌玉及后之服屨赤舄爲上故有人  
君盛履之說王錫韓侯玄衮赤舄獨非諸侯耶二詩孫字俱  
當如字讀未敢以康成爲墨守

神仙不埽文字

葛稚川爲將兵都尉從討石冰有勳朝議爵之不肖受願博  
觀祕府異書如此胸懷自是句漏丹砂種子華陽宰相前後  
一轍得爲才鬼猶勝頑仙神仙初不埽文字八會真書故非  
不識字漢所擔青羊君云絕學無憂直謂涉而不留耳如必  
埽盡墨卿才登仙錄則咸陽一炬何竟爲徐市所給乎周公  
謹稱其先人酷嗜書至鬻負郭之田供筆札之用余謂俗情

不染方能說法度人卽此現是神仙那必遙尋方丈忍飢誦  
經作天際想所云柳下惠不以三公易其介者也

其出是塵土

山海經巴國方三百里其出是塵土用修云謂其地清曠無  
塵埃誤按郭注云言殷盛也楊雲蜀都賦云埃敦塵拂萬端  
異類財物饒贍蓄積備具左太冲云市鄜所會萬商之淵二  
賦乃山經注腳也如用修云云長安陸海果亦遙指瀛渤耶  
渠所引冰壺浸兩儀之句可作洞庭詠耳

用修不曉彑字

蜀夾江縣酒官碑分書其中有云南由市入爲闡北抵湖出  
爲彑闡中之館用修僅引唐韻彑卽亦字未詳其義按亦古

掖字說文云人之臂亦也从大象兩亦之形漢書高后紀入未央宮掖門師古曰非正門而在兩旁若人之臂掖也掖腋古通亦闔卽掖門也

黃陵廟

以下箋閱子京湘煙錄

岳之黃陵癸比氏墓癸比氏舜第三妃二女者癸比氏出也一曰宵明二曰燭光山海經言洞庭之山帝之二女居之是也又云舜二女處河大澤光照百里大澤者洞庭之謂而光照者威靈之所暨也說者見堯典有二女之文遽以爲堯女舜妃厥妄甚矣羅長原云張謂長原不信秦博士漢校書郎而沾沾皇甫士安語豈黃陵定案哉第存而不論可也

海陵王志



按東觀餘論云玄暉自以草隸名當時後人目以飛華滿目  
殘霞照人此志結字高雅必眺書沈載此文於其書亦小異  
如温文著性石本云者惟嗣德方衰石本云方褰曉夜何長  
石本云晚夜當以石本爲是張考韻書云晦而月見西謂之  
眺玄暉當從眺不從眺也

郝閣頌

按曾子固金石錄嘉祐閒晁仲約得郝閣頌以遺余稱武都  
太守陽阿李翁之所建永叔以爲李會非也頌中又有功曹  
吏李旻歐亦不錄廣川書跋云郝閣頌醜散關之嶮潔徒朝  
陽之平慘潔當作溼慘當作燥醜當作易又頌云遭遇隕納  
人物俱隋所云隕納者則以傾隕地壤自納於淵也丁度集

韻潔灑溼三字同用修取溼燥之說更以潮爲潮以醴爲釋  
考漢隸楊厥碑繁陽令碑醴俱作釋未有作易者彥遠何以  
有此言又漢隸分韻載此碑云在興州髦作毳溼作盆鬼作  
醴滿作漏瘡作瘡苦作苦皆歐公所未載碑中行李作行理  
聞此此字作屯與草書同尤可異也

漢潭于長夏承碑

金石錄云元祐中洺州治河得之於土壤中刻畫完好如新  
然不言爲何人書也元王惲跋此碑始定爲蔡邕書都玄敬  
云碑今在廣平府學後刻尙書蔡邕及永樂七年等字乃庸  
妄人所加心竊疑之江陰徐子擴嘗得舊刻雙鉤其字近以  
惠子與此殊異此云勤紹舊刻作勤約云云按漢隸分韻載

此碑策作第勳借薰轡作戀奄作淹孩借咳蹤借縱殲作載  
踊作通字畫奇險今不復見玄敬君房錄此俱從俗書僅薰  
字淹字縱字從石本耳

鄭璠爲象江守輦石歸費錢六十萬

鬱林太守作此狡獪榮陽是牙後慧耳子瞻云我攜此石歸  
袖中有東海此老人真得九華三昧然不如向印闍黎作供  
尤覺淨俶俶赤灑灑遇明眼人舉似昔有舉鄭璠輦石因緣  
者一人應聲曰這癡人何不買百弓上水田九品入流官乎  
今自負真經濟者大率類此

蒲萄

魏肇師說蒲萄引魏武語酒醉宿醒掩露而食蒲萄一作蒲

陶見史記大宛傳一作蒲桃高祖報尉佗霍光妻遺澤于衍  
皆以蒲桃錦陸翽鄴中記亦有蒲桃錦按酒醉以下諸語載  
曹子桓詔武字當作文酒醉詔作解酒詔又有除煩解餽語  
亦勝掩露二字從來無有道著者

唐進士櫻桃宴

飽食不須愁內熱大官還賜蔗漿寒此右丞櫻桃詩也僕謂  
櫻桃何能熱人熱從蔗漿生耳朝受命夕飲冰亦豈櫻桃崇  
耶酸措大不以進士兩字著胸中日日蔗漿在嚙矣劉氏子  
大是俗物

宋高宗云石之有眼余亦不取

李北地硯銘云世以眼貴女而無此人其瓦礫女迺知英雄

之見略同今區區於鸚鵡云者卻被陶泓氏換卻你眼睛了也北地銘研在余家

學齋佔俾載張曙擊甌賦

此賦已錄英華中按飛燕外傳云帝以文犀簪擊甌此爲擊甌祖系庾肩吾狹斜行云三子俱來宴玉箸擊清甌不知馬處士傳得劉郎正派否又段安節樂府雜錄云武宗朝郭道源善擊甌率以邢甌越甌共十二雙旋加減水於其中以筋擊之咸通中有異蟻者亦善擊甌擊甌蓋出於擊缶楊用修亦云藺相如請秦王奏盆瓠唐人擊甌今人水盞殆祖之

夷白齋詩話

太白題所寫詩後曰賀生爲我辨之汝年少眼明載夷白齋



詩話張按跋語殊不類青蓮濯魄冰壺自是本色賀生語豈指乘船叟耶賀監年八十餘迺還越年少眼明復何所指

司空圖詩賦

表聖詩云儂家自有麒麟閣第一功名只賞詩此賦亦有戰昆陽走虎豹氣象然使香山居士何處生活

箋溫庭筠錦鞋賦

賦略云耀粲織女之東足嫵婉嫦娥之結璘碧縹緗絢鸞尾鳳頭鞵稱雅舞履號遠遊匍匐非壽陵之步妖蠱實芋蘿之施擎箱回津驚蕭郎之始見李文明練恨漢后之未

持

甘石星經漸臺四星在織女東足結璘姮娥別名縹緗中紉

純緣也絢履頭飾也周禮黃纁青絢鞮屨之舞以革爲履取  
舞蹈之便也繁欽定情詩何以消滯憂足下雙遠遊洛神賦  
踐遠遊之文履妖蠱之蠱古冶字梁武東飛伯勞歌平頭奴  
子繁履箱所謂蕭郎始見也漢后云者馮無方於太液池持  
飛燕履也

同昌公主九鸞千釵

南齊書東昏爲潘妃造琥珀釧七十萬同昌九鸞豈別是潘  
物耶蘇鶚真是說夢按辭夜來有龍鸞釵飛燕有紫玉九雛  
釵蘇借此作齊諧耳

茄呼伽

酉陽雜俎云茄呼伽未知所自考楊雄蜀都賦盛冬育筍舊

菜增伽章樵注伽古茄字茄之爲伽舊矣柯古曾未見耶

罷亞

罷亞一作穉稭或作耙稭東坡簡陳季常詩門外罷亞十頃  
田張伯玉閒望詩穉稭西成稻逍遙北海尊毛滂禱雨詩百  
里飽看紅穉稭一杯輕媿黑蜿蜒王永嘉風俗賦云耙稭一  
空玉粒如峙

瓦松烏韭

崔融瓦松賦云慙魏宮之烏韭蘇恭唐本艸注垣衣古牆青  
苔衣也其生石上者名昔邪一名烏韭山海經云小華山其  
艸有艸荔狀如烏韭生於石上亦見廣雅謝希逸月賦陳思  
王綠苔生閣芳塵凝榭魏宮語本此酉陽所云明帝好之當

別有據烏非唐詩紀事作烏悲誤

曲有疏勒鹽

洪容齋云唐曲又有黃帝鹽白鴿鹽神雀鹽歸國鹽唐詩更  
奏新聲刮骨鹽謂之鹽者如吟行曲引之類用修引戴記鹽  
諸利之鹽音豔鹽者豔之聲轉也僻道衡有昔昔鹽詩微之  
詩葉奴歆浙浙又訛爲浙浙矣

蔡肇詩

蔡肇字天啟丹陽人性高雋見米海岳西園雅集記海岳墓  
天啟銘之荆公子瞻亦參其神契任中書舍人日艸張天覺  
制膾人口嘗與子瞻魯直諸人典試事載臨川東坡二集及  
宋史新編文苑傳天啟詩不多見曾見其題三茅風雨圖云

筆閒雲氣生豪末紙上風聲聽有無收得三茅風雨樣高堂  
六月是冰壺亦琅然可諷也

鄭康成注漢宮香方

略云沈水香二十四銖著石蜜複湯鬻以寒水炭四焙之  
云云閉以黃堊云云今大官加蜜鬻紅螺加麝外家效之

以珠贖

鬻字誤當作鬻周禮鹽人凡齊事鬻鹽以待戒令鬻古煮字  
華嚴鬻香之鬻以鬻賣為義不可混寒水者寒水石也堊音  
牟一音毛詩旄卍釋文云旄字林作堊或作蝥周禮瘍醫注  
合黃堊云云釋曰案內則有敦堊卍鄭注敦堊黍稷器不  
言黃此言黃者見時合和丹藥者為之本艸蘇頌曰甲香生



南海其螺大如小拳南州異物志甲香大如甌其屬離眾香  
燒之益芳又有小甲香狀如螺子取其蒂修合也傳信方每  
甲香一斤以泔斗半微火煮一復時又以蜜二合水一斗煮  
三復時乃以炭火燒地令熱洒酒令潤鋪香於上擣爛入沈  
香末三兩麝一分和擣印成此卽漢宮方也珠賸疑卽珠胎  
也甲煎見范蔚宗傳庾子山詩

選格

卽選官圖

陸放翁跋彩選云子方從事金丹丹成不死直餘事耳後五  
百年過雲門草堂故址思昔作彩戲豈非夢耶語亦豪

段成式連珠

段成式連珠銅銜麗人石室素女名比大喬居連小市云云

按沈隱侯賦狹斜才女銅街麗人亭亭似月嫵婉如春郭景  
純山海經注都廣之野素女所出也用修云素女在青城天  
谷今名玉女洞王褒僮約云當爲婦女求脂澤販於小市

水唐

水經注略云蘆縣疏水中有物七八月中好在磧中自曝  
膝頭似虎掌爪常沒水中出膝頭人欲取弄戲便殺人或  
曰人有生得者摘其臯厭可以小使名爲水唐者也荊州  
記云摘其鼻厭可小小使名爲水盧孫汝澄云臯厭可爲  
媚藥善使內也

陶隱居刀劍錄漢章帝建初八年鑄一金劍投伊水中厭人  
膝之怪引水經語亦與今文小異今伊水轉爲疏水未詳摘

其鼻句厭字屬下卽厭勝之厭也按太平御覽引十道記云  
涑水亦名襄水襄沔記云中廬有涑水注於沔此水有物啖  
人名曰水虎生得者摘其鼻可小小使之然則疎者涑之誤  
也荊州記合諸書語益明孫云媚藥何據使云者如黃公之  
制柁御虎也又山海經云蔓渠之山伊水出焉有獸焉名曰  
馬腹其狀如人面虎身其音如嬰兒是食人水唐之爲馬腹  
審哉海外經云聶耳國使兩文虎黑齒國食稻使蛇大荒經  
爲國中容白民之國俱使四鳥虎豺熊羆司幽黑齒玄股三  
身張弘毛民之國俱使四鳥讀此可得使字義矣

筴筴字義

南部新書載契丹盧文進出獵忽天暗星見土人謂之筴平

廣記作筴按楊雄方言符籥楚魏間謂之倚伴郭景純注云似蘧

蔭直文而麤江東呼筴音鞞詩韻輯略云筴也一曰覆舟籥

古樂府病婦行云有過慎莫筴筴行當折搖又橋名見金陵

瑣事楊誠齋江東集過筴橋詩云輕風欲動沒人知阜被垂

楊報酒旗行到筴橋中半處鍾山飛入轎窗籬又人姓見茅

山志及升庵希姓錄又諸暨有鳥筴山見一統志筴字韻書

不載獨廣雅云筴才六反謂之筴七夜反揲堂距也古樂府筴字

且不從且也日中見沫未問筴義彼中夷語有之耳閔子京云或

爾時取蓋覆義耶

張又閱羯鼓錄云汝陽王嘗帶砑絹帽子打曲上自摘紅

槿花置帽上筴處坊本作筴誤予以王字泰筆塵所引正之又夢谿筆談云趙

韓王治第葢屋皆以板爲筮上以方塼螿之然後布瓦予  
謂此筮字亦筮之轉譌也且可證葢覆義

吹景集

四終



欽定四庫全書

禮部通考卷一百一十五

吹景集十四卷明董斯張撰斯張原名嗣暉字然明號遐周  
又號借庵又名廣曙烏程人廩貢生清羸善病自號瘦居士  
於生計最拙獨耽於書手錄不下百帙泛覽百家旁通二氏  
生平契厚皆海內名士商榷著述結社聯吟力扶詩教此書  
卷一朝玄閣雜語四十則靜歎齊嘔三十二則卷七克殷度  
邑二解補伏生書有自序云世儒謂周書出汲冢乃克殷度  
邑二解載史記確爲逸書非後儒竄入者太史公去伏生不  
遠其辭亦近之余意以史載湯誥及二解補伏生今文書而  
以古文別爲一錄卷十三合疏董彥遠除正字謝啟與閔元  
衢同撰有自序除十一卷雜攷證一百七十餘條如辨戎路  
表爲僞作識在黃伯思之上至王伯安嘉靖我邦國一語與

嘉慶末年陳繼昌廷對策道光宇宙同皆適然之事謂之語  
識則可謂之前知則不可也刻本罕見歲在柔兆執徐六月  
吳興張鈞衡跋

其續本或云余以史傳考補及之類皆存古今史書

四一類亦與諸論論論論論論論論論論論論論論論論

四二類亦與諸論論論論論論論論論論論論論論論論

四三類亦與諸論論論論論論論論論論論論論論論論

四四類亦與諸論論論論論論論論論論論論論論論論

四五類亦與諸論論論論論論論論論論論論論論論論

四六類亦與諸論論論論論論論論論論論論論論論論

四七類亦與諸論論論論論論論論論論論論論論論論